

華嶽志

卷之四
卷之三
卷之二

風陵文庫
文庫19
F 67
又



華嶽志卷二

關門李 榕蔭伯甫纂輯

華麓楊翼武燕庭甫評閱

人物

山之名以人著山無名人山不名矣人之托於泉石者他
客騷人品致不一然皆足為山增重故論者以山無名人
為恨華山秀甲天下秦漢以來代有名人畧而不記其如
遺恨何且無以為山靈光也輯人物列高士凡石室著書
隱居求志以及優游泉石之士無不俱載而以列仙終焉

高賢

秦

楊碩字太初晉叔向之後祈盈之難其先人逃居華山仙谷及碩隱居不仕洞習天文生八子俱從沛公征伐第八子喜繫殺項羽封赤泉侯

唐書

漢

楊寶字稚淵年七歲行至華山見一黃雀被傷墜地為螻蟻所困憐之因收于巾笥中採黃花飼之旬日瘡愈旦去暮來忽一朝變為黃衣童子見寶下拜持玉環四枚贈曰俾君子孫潔白位三公有如此環

瑯琊代醉編

楊震字伯起寶之子也少好學受歐陽尚書于太常桓郁明經

博覽無不窮究諸儒為之語曰關西夫子隱華山牛心谷教授生讀學者如市其谷多槐因稱槐市常居湖有冠雀啣三鱸魚飛集講堂都講取魚進曰蛇鱸者卿大夫之象數三者三台先生自此升矣年五十始仕至太尉以譖憤飲酖死露棺道側行路皆為隕涕順帝即位譖者伏誅以禮改葬于潼亭先葬十餘日有大鳥高丈餘集震喪前俯仰悲鳴淚下霑地葬畢飛去留翎于朝陽山後人謂之留翎鬚子秉官太尉秉子賜官司徒賜子彪官司空果如黃衣之言

後漢書

高恢字伯達京兆人也少治老子經恬虛不營世務與梁鴻善隱于華陰山中鴻東遊思恢作詩曰鳥嚶嚶兮友之期念高

子兮僕懷思想念恢兮爰集茲二人遂不復見 高士傳

江淹論曰高伯達坐於華陰之山心常慕之而未能及也

張楷字公超蜀郡成都人通嚴氏春秋古文尚書司隸舉茂才

除長陵令不至官隱居宏農山中學者隨之所居成市後華

陰山南遂有公超市性好道術能作五里霧時關西人裴優

亦能為三里霧自以不如楷往學之楷避不肯見桓帝即位

優行霧作賊事覺被考引楷言從學術楷坐繫廷尉詔獄積

三年以事無驗見原還家終 後漢書

辛繕字公文治春秋讖緯隱居華陰山中弟子授業者六百餘

人所居旁有白鹿甚馴不食火光武徵不起有 大業

鷄頭燕頰蛇頸魚尾五色備舉而多青栖繕槐樹旬時不去

宏農太守以聞詔問百僚咸以為鳳太史令蔡衡曰凡象鳳

者有五色多赤色者鳳多青色者鸞多黃色者鷓鴣多紫色

者鸞鸞多白色者鵠今此鳥多青乃鸞非鳳也上善其言 三輔

決錄

晉

王猛字景畧北海劇人也博學好兵書謹重嚴毅氣度宏遠少

遊鄴都時人莫識惟高平徐統見而奇之名為詞曹遁而不

應隱于華山懷佐世之志桓溫入關猛被褐見之一面談當

世之事捫虱而言旁若無人溫察而異之賜猛車馬拜高官

都護請與俱還猛還山問師師曰卿與桓溫豈并世哉在此
 自可富貴何必遠也乃止符堅將有大志聞猛名遣呂婆樓
 招之一見便若生平語及興廢大事異符同契若元德之于
 孔明也及堅立以猛為中書侍郎後至尚書令崔鴻十六國春秋
 郭文字文舉河內人少愛山水游名山歷華山之崖窮谷無人
 之地倚木于樹苦覆其上而居亦無壁障時猛獸為暴入屋
 害人而文獨宿十餘年卒無患害宋史嘗于華山石室中得神
 虎內真紫元丹章乾符中封靈曜真君真境錄

隋

楊伯醜馮翊武鄉人好讀易隱于華山隋文帝徵至京師見公

卿不為禮無貴賤皆汝之高祖名與語無所答賜之衣服著
 之朝堂捨之而去嘗被髮狂賣卜于市卦無不中國子祭
 酒何妥與論易悠然而笑曰何用鄭元王弼之言乎于是測
 理辨答思理元妙大異先儒之旨因問其所學曰太華之下
 金天洞中我曾受羲皇所教之易與大道源同理窮眾妙世
 人莫能測也數年復歸華山後世人有見之者仙傳拾遺

唐

司馬郊字子都隱居華山五十年禽獸日遊目前有如家馴每
 灌園不食菜心心傷其生意山果熟鳥啣果日送齋中及卒
 百禽聚于庭悲鳴累日而去唐書

王易簡字國寶京兆萬年人好學工詩唐僖宗時避亂山中梁
 乾化中舉進士擢第復隱華山後唐明宗時辟為羅周恭掌
 書記府罷退居華陰作小隱詩二十首并序以見志歷晉周
 迄宋以太子太保致仕加少傅所居華下構一鳴堂二品樓
 優游自適年七十九卒 宋史

按唐時隱華山者又有李岡 見岑參詩 丹邱子岑參 見李馬戴見
 島 其事蹟俱失考附記于此

後晉

鄭遨字雲叟滑州白馬人少好學敏于文詞唐昭宗時見天下
 大亂有拂衣遠去之意先入少室山為道士闡華山有五粒

松脂淪入于地千載化為藥能去三尸因徙居求之與道士
 李道殷羅隱之交當世目為三高士節度使劉遂凝數以寶
 貨遺遨不受素與李振善欲邀以祿亦不顧唐明宗召為左
 拾遺晉高宗召以諫議大夫皆不至賜號逍遙先生天福四
 年卒年七十二生平好飲酒奕棋時時為詩章落人間多寫
 以練素相贈遺以為寶至或圖寫其形疏于屋壁其迹雖遠
 而其名愈彰 五代史

翟士端字表正齊人也博通九經隱居碧雲洞中祥符中真宗
 幸汾陰禮名不起無疾而逝七日支體猶溫及火之有聲如
 雷五色炳耀 王處一志

宋

羅隱之新淦玉笥山玉梁觀道士來居華山之東碧雲洞好詩酒奕棋以貨藥自給有大瓢可辨寒暑置酒其中經時不壞日就花木水石間一酌一咏天福中賜號希夷先生

鄭隱字明處竟之奉符人也以經術為業遇道士傅辟穀煉氣之法左臂有黑鴈子如北斗狀常居玉刁洞自冬涉春不出人咸異之宋真宗賜號貞晦先生又賜歸山詩云獄中逸士本藏名常咏琴樽適性情盡日臨流看水色有時隱几聽松聲遍遊萬壑成嘉遯偶出千峯玩治平談希夷究元冥默號無極沃予心辭城闕歸山林樂爾志號何深已薄紛華存素音好將吟嘯暢冲襟

李道殷與鄭遨羅隱之交善當世目為三高士道殷有釣魚術

釣而不餌能化石為金遨常驗其信然而不之求也五代史隱逸傳

王子華同州人博學能文尤工詩與華山隱者齊人翟士端竟人鄭隱南燕人鄭遨臨江羅隱之等號五高士為一時名流

所推重 姚志

陳搏字圖南亳州真源人四五歲戲渦水岸側有青衣媼乳之自是聰悟日益及長讀經史百家之言一見成誦悉無遺忘頗以詩名後唐中興中舉進士不第遂不求祿仕以山水為樂自言嘗遇孫君仿麀皮處士二人者高尚之人也語搏曰

武當山九室巖可以隱居搏往棲焉因服氣避穀歷二十餘

年但日飲酒數杯移居華山雲臺觀依止少華石室無心世

事邵氏聞見錄搏嘗乘白騾欲入汴州中途聞藝祖登極大笑墜騾曰天下曰足定矣遂入華山葺雲臺觀而居焉

居常寢輒百餘日不起周世宗好黃白術有以搏名聞者顯

德三年命華州送至闕下留月餘問其術搏答曰陛下為四

海之主當以致治為念奈何以黃白之事為念乎世宗不之

責命為諫議大夫固辭不受既知其無他術放還詔本州長

吏歲時存問五年成州刺史朱憲陞辭赴任世宗令齋帛五

十疋茶三十斤賜搏太平興國中來朝太宗待之甚厚九年

復來朝上益加禮謂宰相宋琪曰搏獨善其身不干勢利所

謂方外之士也搏居華山已四十餘年度其年近百歲自言

經承五代離亂幸天下太平故來朝觀與之語甚可聽因遣

中使送至中書琪等從容問曰先生得元默修養之道可以

教人乎搏曰搏山野之人于時無用亦不知神仙黃白之事

吐納養生之理非有法術可傳假令白日冲天子世何益今

聖上龍顏秀異有天人之表博達古今深究治亂真有道仁

聖之主也正君臣同心協德興化致治之秋勤行修煉無出

于此琪等稱善以其語白上上益重之邵氏曰帝初問以佞

出果無功還華山數年再名見謂帝曰河東之事今可矣遂

克太原帝以其善相人也遣詣南衙見真宗及門亟還問其

故曰王門廝役皆將相也何詔賜號希夷先生仍賜紫衣一

必見王建儲之議于是遂定

襲留闕下令有司增葺所止雲臺觀上屢與之屬和詩賦數月放還山端拱初忽謂弟子賈得昇曰汝可於張超谷鑿石爲室吾將憇焉二年秋七月石室成搏手書數百言爲表畧曰臣搏大數有終聖朝難忘已於今月二十二日化形於蓮花峯下張超谷中如期而逝經七日支體猶溫有五色雲蔽塞洞口彌月不散搏好讀易手不釋卷常自號扶搖子著指元篇八十一章言導養及還丹之事宰相王溥亦著八十篇以箋其指搏又有三峯寓言及高陽集釣潭集詩六百餘首能逆知人意齋中有大瓢掛壁上道士賈休復心欲之搏逆知其意謂休復曰子來非有他意蓋欲吾瓢爾呼侍者取以

與之休復大驚以爲神有郭沆者少居華陰夜宿雲臺觀搏中夜呼令趣歸沆未決有頃復曰可勿歸矣明日沆還家果中夜母得心痛幾死食頃而愈華陰李琪自言唐開元中郎官見數百歲人罕見者關西逸人呂洞賓有劍術百餘歲而童顏步履輕疾頃刻數百里世以爲神仙皆數來搏齋中人咸異之大中祥符四年真宗祀汾陰幸華陰至雲臺觀閱搏畫像除其觀田租

宋史

邵氏曰嗚呼世以先生爲神仙善人倫風鑑淺矣至康節先生實傳其道于先生之細者尚以比漢四皓云

种放字明逸洛陽人沉默好學善屬文每往來嵩華間慨然有

山林之意

洛陽志

隱居終南豹林谷聞華山希夷之風往見之

一日希夷令洒掃庭除有嘉客至須臾放作樵夫拜庭下希夷挽之上曰君豈樵者二十年後當為顯官放曰某為道來官祿非所問也希夷曰人之貴賤莫不有命貴者不可為賤亦猶賤者不可為貴也君骨相當爾雖晦迹山林終不能安異日自知之邵氏問見錄真宗祀汾陰駐蹕華陰因登亭望蓮花峯忽憶种放居是山亟命名之放稱疾不應詔上笑而止因問放在家何為對曰臣到放所居會放在廬中看畫水牛二軸上顧侍臣曰高尚之士也

陳戩隱華山博學知治亂大體三十年不出戶庭隣人有不識

者熙寧中有薦者云是希夷宗人詔對便殿上先覽其所進時議甚喜至是命坐賜茶戩乃趨起皇恐謝不敢者再三云上鳴尾乞陛下暫令除去上使之退左右皆掩口笑上亦不怒對輔臣亦不言及一日忽有旨令還山道山清談

邵伯溫字子文康節先生子也事司馬光及二程子光等亦屈名位行輩與子文為再世交及光入相欲薦子文未果而薨旋因人薦為大名府助教調長子尉為西京教授紹聖初章惇為相欲用子文子文不往惇不悅遂監永興軍義不至京師徽宗時以日蝕上書欲復祖宗制度辨宣仁誣謗解元祐黨錮分君子小人戒勞民用財語極懇至又著書名辨誣後

崇寧大觀間以此書出監西嶽廟卒其墓表日以學行起元祐以名節居紹聖以言廢于崇寧世以此三言足以表公云

姚遠翻志

朱熹字元晦諡曰文淳熙十二年己巳受主管雲臺之命嘗與

陸子靜書曰幸叨祠祿遂為希夷直下諸孫丙午三月易學

啟蒙成自號雲臺真逸

姚志

元

楊儼字敬夫涉獵經史通達世務元末隱秦倉谷淡然無宦情

明初累徵不起年九十一終

家譜

明

王汝霖字九谷博學能文避跡華山之麓以詩賦自娛嘉靖登

極有司累薦不起台府高其詣旌其廬著有松隱漫錄草木

靈異錄

賈志

解引樾字拙存韓城人性孝友博學有文名雄才不可一世天

啟戊辰進士授翰林編修闖賊入關隱居太華龍門間讀書

不輟稱韓山樵隱與揚州姚思孝相往復有二老之目所著

素位篇嶽遊草韓原名勝志澹園稿諸書自為墓志以終

姚志

王于曜字元明華陰人崇正庚辰進士為行人司行人陞山西

鹽院赴任至中途返隱文仙谷十三年大饑施粟濟眾瘟疫

施棺席瘞骨三徵不起

姚志

師功凱字雲菴清澗人性孝友不求聞達少好黃老之術居華

山以醫活人弗責報夢帝錫以佳嗣果生子遂謝絕人世徧

遊名山不返 姚志

魏淵淵字空空山右人隱居華嶽性樸誠恬靜甘澹泊絕口不

言世務足不出山者三十年後其子以淵淵老至嶽頂請還

決志不歸其子泣請移綿山乃許之終不至家後無疾卒 賈志

馮從吾字仲好號少墟長安人授教華山青柯坪從學者至三

百餘人著有太華書院會語 縣志

李楷字淑則號河濱朝邑人讀書朝來山遇真人馬嶺仙謂楷

以文章名世天啟甲子登賢書累上春官不第築樓高丈餘

屏居其上令書估日送圖史手自評隲學植益富著有河濱

全集 省志

張雨號清虛子貌清古寡言笑常攜一瓢居東峯石洞中不火

食唯咬松葉及棗栗與王宏撰善崇正癸未十月初六日闖

賊入關之夕跌坐而逝自書其瓢曰我姓張名雨慶陽人年

六十四歲數字而已計在東峯者亦六十四年迨甲申正月

十五日猶端坐如生宏撰為具葬細辛坪祠于所居之洞顏

曰清虛 縣志

孔傑儒字念心潼關舉人崇正癸未闖賊攻關與孫傳庭守南

城城破被執抗志不屈旋得脫隱于華山著石城集 潼關志

盛以恬隱華山讀書自娛

潼關志

張鼎新潼關人隱華山自罷諸生讀易終身

潼關志

王宏睿不樂仕進慨慷有志畧築漱園于華麓優游其間以詩

文自娛

省志

國朝

顧爰武字寧人號亭林崑山人康熙初入關至華下遂為卜居

計王宏撰館之構屋數楹顏曰顧廬旋與宏撰在雲臺觀建

朱子祠遂居華下其與姪書曰新正已移至華下祠堂書院

之事雖皆秦人為之然吾亦須自買堡中書室一所水田四

五十畝為養殮計秦人慕經學重處士持清議實與他省不

同黃精松花山中所產沙苑蒺藜祇隔一水終日販餽便可

不肉不茗今年三月乘道途之無虞及筋力之未倦出嶠函

觀伊洛歷嵩少亦有一二好學之士聞風願交但中土飢荒

不能久留遂旋車而西矣彼中經營方始固不能久留外也

其與王虹友書曰流寓關華已及二載幸得栖遲泉石不與

弓旌而此中一二紳章頗知重道管幼安之客公孫惟說六

經之旨樂正裘之友獻子初無百乘之家若使戎馬不生弦

歌無輟即此可為優游卒歲之地矣明年入晉卒于平陽之

曲沃嗣子歸其櫬平生著述甚富手自抄錄至老不倦貌寢

眇一目留心當世之務重信義不輕然諾一時學者宗之

按先

生崇正間被徵名未仕而國變遂遊齊晉間最後至華山遂有終焉之志

王宏嘉宏撰俱司馬之良子博通經籍善屬文工書法明季之亂兄弟奉祖母及母居華山數十年宏嘉于上方築讀書臺披覽經史著太華存草華山志槃華山記遊復於華下因司馬之遺築湄園以記意宏撰於山巖築讀易廬著周易圖說周易筮述其中既而易以待菴著山志二集待菴日朴逆闖時宏農巨族避華山中山史之待菴山史他適會寇至登山比退人皆識其遺以有之有爲宏撰識之者宏撰歸曰皆非吾之所有毫無取

朝順治初築獨鶴亭於中方下與朝邑李楷蓋屋李中孚富

平李因篤華州東蔭商渭南南廷鉉時相聚設康熙十七年徵辟至京以疾辭不就職與新城王士正長洲汪琬宣城施閏章相友善居數載復歸華下築清澗鳴飲鳳亭於醴泉之側與二三名流吟咏其中年八十一卒宏嘉字玉質號雲隱宏撰字修文一字無異號山史子宜輔亦以文名著著有華山志

葉舟曰雲隱與予交五年所口未嘗及他事每相過尚論古人旁及畫書翩翩一時之俊也山史有古俠隱之風嘗一至其門內輒草葺而山史方鼾睡蓋體疏志放人也大抵讀書樂道自爲機雲之合與世無競二子之志畧同而雲隱溫藹

如玉山史慷慨豪舉則其少異也

史調字勻五號復齋少肆力於學居華麓雲臺觀二十餘年自號雲臺山人潛心先儒語錄自用居處以及辭受取與咸嶽嶽有風節是時三秦學者翕然而來視其質之尤異者授以聖賢之道猶諄諄義利之辨使默自驗于言行之間其文學者必導以程朱之理不苟爲炳炳烺烺蓋自顧亭林王山史諸先生講學後興頑起懦未有如先生者矣

墓志

王澄源字湛虛家於華山下恬退自適博通經史居雲臺觀教授生徒問難者日踵其門已而年老退息購山田數畝疏渠引水藝菽種樹蒔花栽竹優游泉石以自娛時人比之楊光

祿云

仙真

上古

蘇林字子元濮陽曲水人少稟異操有訪真之志師華山真人

仇先生仇先生者湯王時木正也得服氣胎食之法還神守

魂之事以漢元帝神爵二年三月七日登天西北去道家所

謂元洲上卿

雲級七籤

青烏公彭祖弟子入華山學道積四百七十一歲十二試有三

不遇後服金液昇天太極道君以爲試三不遇但仙人而已

不得爲真人

真誥

李八百名脫蜀人居筠陽五龍岡歷夏商周八百歲又動則行

八百里因號為李八百修煉于華山石室丹成還蜀續文獻通考

馮長字延壽驪山人年十五即通陰陽占候之書周宣王聞之

辟為柱下史常內浴外混懼涉興衰觀天文錯亂恐禍將及

已乃退居託疾日誦五千言兼服天門冬五六年稍覺其益

感真人鄧先生授以靈書紫高寶神之道長乃轡晨登景御

氣遊元經十餘年復遇真人彭宗駕白虎將侍者二人降于

室長設弟子禮從求道要真人出太上隱書以授長又注真

八景味太九元寓景流霄宜保太漠爾乃遊邁元隰觀覽安

危時逢有疾無不垂護嘗有狂者陰為治之或十日五日而

差有癩人求哀不一月即愈有失火者簷棟相連風焰交馳

無能撲滅長以意救之火自止年八十餘以平王二十年庚

寅春三月昇化時天帝遣仙官下迎授書為西嶽真神上遊

上清姚志

李翼師真人王探得道仙去以道授河上公傳道德五千文深

究谷神元牝之旨又遇真人傳易洞曉陰陽造化是故探蹟

索隱鉤深致遠與天地合其德與鬼神合其吉凶用能尸居

而龍見淵默而雷聲神動而天隨登天遊霧撓挑無極一日

功成道備元德升聞天帝授書為西嶽仙卿姚志

秦

茅濛字初成咸陽人知周之衰不事諸侯初師鬼谷先生後隱
 華山以始皇三十年九月庚子于華山乘雲昇天先是邑人
 謠曰神仙得者茅初成駕龍上昇八太清時下沅洲戲赤城
 繼世而往在我盈帝若從之臘嘉平始皇聞之欣然有從仙
 之志因改臘月嘉平應邑人謠也至其五世孫茅盈果得上
 仙為東嶽上卿司命真君 甘水仙源錄

古丈夫秦二世時驪山役夫逃難華山唐大中初陶太白尹子
 虛同陟芙蓉峯于松下見一丈夫古服儼雅一女子鬢髻彩
 衣問之丈夫曰僕秦之役夫彼秦宮女子合為殉者同匿于
 此不知經幾甲子也二人遂求金丹大藥丈夫曰子本凡人

初餌柏子後食松脂歲久凌虛毛髮紺綠不知金丹大藥也
 吾有萬年松脂千年柏子可分食之二人拜謝因巢居蓮花
 峯上雲臺觀士往往遇之話得道之由云 華陰縣志
 論曰李楷曰古丈夫名子華秦官也隱華山受毛丹經蓋君
 子而學仙者余不及深考然讀丈夫詩豈役夫所及蓋托于
 役夫以自晦未可知也

漢

裴元仁扶風夏陽人年十餘歲道人支子元相之曰子目中珠
 似北斗搖光自背以下象河魁既有官爵又當神仙因以仙
 人蔣先生神訣五首授之元仁精思積十一日夜視有光年

二十三州辟主簿後遷冀州刺史有仙人乘白鹿下庭中曰
我亦松子也聞子好道故來相過勤存五靈當得真道元仁
遂棄官登華山入洞元石室積二十三年有五老來詰元仁
再拜一老青衣青巾拄青杖帶通光陽霞之符乃東方歲星
賜以青芝出紫微始青道經一卷一老白衣白巾拄白杖帶
皓靈扶希之符乃西方太白星賜以白芝出太素玉籙寶元
真經三卷一老蒼衣蒼巾拄蒼杖帶鬱真籙鳳之符乃北方
辰星賜以蒼芝出蒼元上籙北斗真經中命四旋經四卷一
老赤衣赤巾拄赤杖帶四明朱碧之符乃南嶽熒惑星賜以
丹芝出龍胎太和丹經二卷一老黃巾黃衣拄黃杖帶中元

八維玉門之符乃中央鎮星賜以黃芝出四氣上樞太元黃
書八卷元仁拜受服芝讀經飛步隱形遊行天下後遇太素
真人授以法書道成昇天受符爲清靈真人

雲級七籤

修羊公魏人也居華山石室有懸榻臥其上石盡穿陷畧不動
時取黃精食之後以道聞于景帝帝禮之使止王邸中數歲
道不可得有詔問公何日發語語未訖牀上化爲白石羊題
其脇曰修羊公謝天子後置羊於通靈臺羊復去不知所在
劉向贊曰卓矣修羊韜奇含靈枕石太華餐茹黃精漢禮雖
隆道非所經應變多質忽爾變形

列仙傳

衛叔卿中山人服雲母得仙漢儀鳳二年乘雲車駕白鹿集于

殿前武帝問之答云由山衛叔卿帝曰若是乃朕臣也可前共語忽不知所在帝悔恨求得其子度世令追之度世至華山下見父與數人博戲石上度世再拜言故叔卿曰前爲太上所遣欲戒帝以大災之期及救厄之法而強梁自貴度欲臣我不足與語是以去耳度世問數人爲誰叔卿曰洪崖先生許由巢父火低公飛黃子王子晉薛容也汝歸勿爲漢臣亦不復語帝度世辭去後亦以服雲母得仙

神仙傳

稷邱公華山道士武帝封禪公擁琴來迎

列仙傳

伯山甫雍州人入華山精思服食二百年不老至人家數人先世以來善惡功過有如目見又知方來吉凶言無不效甥衣

年七十與之以藥還少漢武帝遣使者行河東見城西有一女子笞一老翁使者怪問之女子曰此乃妾子舅氏伯山甫以神藥教妾妾教子服之子不肯今衰老行不及妾故杖之使者問女子年幾何答曰妾一百三十歲兒七十一矣後入

華山

神仙傳

李仲甫豐邑人少學道于王君服水丹有效兼行遁甲能隱形初隱百日一年復見形後長隱但聞其聲與人對語飲食如常在民間三百餘年後入西嶽山

神仙傳

孔元方許昌人常服松脂茯苓老而益少或請元方酒元方作一令以杖拄地手把杖倒豎頭在下足在上持杯倒飲人莫

能也後委妻子入西嶽

神仙傳

孟岐清河逸人也年七百歲語及周初事了如在目前見周公抱成王以朝于周廟岐時侍周公登壇上以手摩成王足周公以玉笏與之岐嘗寶執每以衣袂拂拭笏厚七分今銳欲折恒餌桂葉在華山下捨藥聞漢武帝好仙披草萊而後不知所之

真仙通鑑

周義山字季通汝陰人也漢昭帝時為青州刺史後登太華山

遇南嶽赤松子授上元真書

真仙通鑑

燕濟字仲微漢明帝時人隱華之三公山石室中受裴君玉佩金璫經及石精金光符復有太微黃書居石室中服蒼木黃

精恒散髮亦有練巾惟月朔乃服之時復彈琴吟咏常有黃

白雲覆其上後別交友乘雲而去

神仙傳

王褒字子登范陽人漢安國侯陵之七世孫黃門侍郎摺之子

少通墳典大將軍王鳳辟為從事高蹈不屈年二十四入華

山寢息空林九年一日夜半忽聞林中有馬簫鼓之聲須

臾漸近神人乘雲車呼褒言曰吾太極真人西梁子女也聞

子好道故來相視遂與以至道後又遇太極夫人西城真人

授以太上寶文大洞真經由是道成能飛行萬里神策拜為

太素清虛真人

真仙通鑑

韓眾漢成帝時劉根棄官學道于華山見一人乘白鹿車從十

餘人玉女四人執采旌之節根稽首求一言神人曰爾聞韓

衆否答曰聞有之神人曰我是也必欲長生先去三尸三尸

去卽志意定嗜欲除也乃以神方五篇授根神仙傳

魯女生長樂人初餌胡麻及米絕穀八十餘年更少壯色如桃

花一旦與親故別云入華山去後五十年先相識者逢女生

華山廟前乘白鹿從玉女三十人并令謝其鄉里神仙傳

馬明生臨淄人姓和名君實少爲賊所傷殆死遇太真夫人與

藥一丸服之而愈乃自號馬明生隨夫人執役東嶽石室夫

人憐其專謹付安期生從之周遊天下二十年授以太清金

液神丹而告之曰子若未欲昇天但先服半劑明生乃入華

山依方合金丹服半劑人怪其不老復服半劑白日升天真仙

通鑑

陰長生新野人漢皇后親屬好道術聞馬明生得度世之法乃

尋求之得相見執奴僕之役明生不教度世之法但日夕別

與之談論當世之事治農田之業十餘年共事十二人悉去

長生執禮彌篤明生曰子能得道矣乃將入青城山煮黃土

爲金立壇西面以太清神丹經授之明生別去長生歸舍之

丹成乃作金十數萬斤以布惠天下之貧者妻子相隨皆壽

而不老在人間三百餘年著書九篇自叙畧云漢延光元年

新野山北子受仙君神丹要訣道成去世付之名山如有得

者列為真人一通封以青玉之函置太華山上

赤斧者巴戎人莫知其姓名為碧鷄祠主簿能作水瀆煉丹與

硝石服之三十年反如童顏毛髮皆赤後上華山取禹餘糧

服之復賣于蒼梧湘江間累世傳見之手掌有赤斧焉列仙傳

呼子先漢中關下卜師也壽百餘歲臨去呼酒家老嫗曰急裝

當與嫗共應中陵王夜有仙人持二茅狗來呼子先子先持

一與酒家嫗騎之乃龍也上華山常于山上大呼云子先酒

家母在此列仙傳○賈氏說林呼子先夜不寐臥惟倚藜杖

閉目少頃即謂之睡後與酒啜仙去留其杖子先

故人陸麟寶之謂之藜床古谷先生不知何許人隱居華山修行九息服氣之法後合爐

火大丹服之得道洞仙錄

白羊真人莫知姓名隱于嶽之西北洞常乘白羊往來塵世後

與弟子介琰俱登仙以此號為白羊真人真人有禁山錄及

制虎豹狼熊符七十道行于世干處一志

黃蘆子楚人也姓葛名期一作越隱居黃神谷能治病千里寄姓

名與治之皆愈不必見病人身也善氣禁之道禁猛獸飛禽

皆不敢動禁水水為逆流年二百八十歲力舉千鈞行及奔

馬頭上常有五色光氣高丈餘天大旱名谷內潭中龍使昇

天作雨數數如此一日乘黃龍去遂不復見真仙通鑑

鍾離權威陽人為郎中與弟簡俱入華山權生而奇異美髯俊

目身長八尺八正陽洞修煉自號天下都散漢道成白日昇

天真仙通鑑鍾離權不知何時人間出接物自謂生于漢常草其

詩字畫飄飄有凌雲之氣宣和錄

郎宗字仲綏後漢時人為吳令學精道術占候風氣一旦有暴

風夜起占知洛陽大火燒長夏室廬往問果爾朝廷聞之以

博士徵宗恥以占術就職夜解印綬負笈遁去居華山下服

胡麻得道真仙通鑑

亞公莫知姓名常懸壺于市上日入之後跳入壺中費長房為

市掾見之從之學令住石室中有一方石廣丈餘壺公以茅

繩繫之懸于空中令長房坐石下使諸蛇蟲咬繩繩欲斷而

長房自若公撫之曰子可教矣賜子為地上主者石室在

西北孤峯上雍勝畧

元魏

王暉魏時人白羊公之弟子也居熊牢嶺常種黃精于溪側虎

豹為之耕耘出入迭乘虎豹與乘馬無異後以道術傳王法

冲乃尸解而去真仙通鑑

重白和魏朝仙人也河北王母蓋有道者和每拜見王母常坐

而止之語諸人曰阿和是吾隣家兒後和去不知所之晉惠

帝元康二年相識見和在華山中乘虎從王母顏色更少真仙

通鑑

晉

尹虔子張石生李方白並晉武帝時人學道華山受仙人管城子蒸丹餌術又受蘇門張壽陵服丹霞之道五十年精心內視不復飲食體骨輕便色如童子以晉永和元年二月十二日昇仙今在元洲為高仙石生為東源伯

真誥

劉少翁不知何地人曾數入太華禮拜向山如此二十年忽一日得見西嶽丈人授仙道

真誥

施存真號浮胡先生師黃廬子得三黃內文驅虎豹之術晉元

康問白日騰昇

真誥

路光又名太安漢順帝時生歷三國堅心慕道遇姑射老叟授

以六天如意大法經錄晉武帝太康五年往華山仙掌峯修

煉永熙二年二月十五夜夢太上老君命右侍玉童賜玉簪

匙十事叅合前老叟法書夢覺神開意解自此書符治病驅

邪無不應驗永康間秦地疫毒虎兇為暴光奉勅施符布法

一境獲安惠帝賜之金帛笑而不受太安元年八月十二日

夜夢太上老君謂曰年與名同可以冲天覺則身輕條忽飛

舉而去

真仙通鑑

寇謙之字輔真北魏時人自云寇恂之十三世孫早好仙道餌

藥歷年無效幽誠上達有仙人成公興者假傭于謙之從母

家謙之算七曜有所不了興為布之俄然便決謙之師事興

乃令謙之潔齋三日共入華山令居一石室自出採藥與謙
之食不復復後謙之入嵩山尸解

魏書

按此與述異記不
同傳聞之異也

韋節京兆杜陵人莊帝時爲陽夏守師事道士趙通遂棄官入
華山卜居華山因號華陽子得三洞靈文神方秘訣餌黃精
撰三洞儀序老子易論周武帝時賜號精思法師太和中忽
彩雲覆其廬節曰吾當乘此而去遂化昇

真仙通鑑

焦先字孝然河東人年百七十餘歲常食白石分以與人熟煮
如芋日人山伐薪以施人徧置人門或設食與坐卽坐不與
人語結草庵獨處其中或數日一食行不由徑不與婦人言
冬夏一單衣太守董經往視之亦不語遭野火燒其庵先坐

庵下不動火過庵爐徐徐而起衣不焦灼乃更作庵忽大雪
庵倒人往不見先謂已凍死折庵求之先乃熟臥雪下氣休
休如盛暑醉睡之狀衆驚其異欲從學道先曰我不知也忽
老忽少二百歲後不知所終

姚志

焦公崖在嶽東南焦真人居
于此

峯巖名勝

傅先生不知何處人好道入焦山石室中積七年而太極真人
接之與一木鑽令鑽一石盤厚五尺許告之曰穿此石透當
得心甚專晝夜鑽之四十七年不替鑽盡石穿遂得神丹爲
西嶽真人

姚志

後周

焦曠字道廣周武帝時獨居雲臺峯避粒餐霞常有三青鳥報
禾然之事武帝親詣山庭臨軒問道因于谷口置雲臺觀後
弟子洪先等見師道廣乘一物如麟往而不返矣

王處一志

王廷字子元扶風人九歲好道訪華山雲臺觀師焦真人曠曠
授三洞秘訣真經武帝詔至京久之得請還觀復詔增修以
居之然山石無土致之極難因默禱忽踊土出于觀側取多
而不竭常苦乏油又置一器經夕自滿久用有餘文帝禪位
置仙都觀詔延居之仁壽四年春謂門人曰吾欲歸西乃委
化于觀中帝遣使護葬于西嶽及就壙但空棺而已

真仙通鑑

唐

姚得一華山道士也武德二年華州司馬高陵公孫璞戕害物
命患瘡遍身使其子求治得一曰此衆寃所為可修黃籙大
齋懺悔夙寃庶疾可愈果如其言平復後璞人山禮謝畢得
一取經一卷展于崖上化為一橋二青龍負之令璞緣其上
須臾至家明日復往遂失所在

真仙通鑑

張公弼貞觀中雲臺觀劉法師每三元設齋而一人衣縫掖而
鰲瘦來居末坐齋畢而退如此者十餘年衣服顏色不改法
師怪而問之對曰予張公弼也往蓮花峯東隅法師請同往
公弼引入華至一石壁下徑濶數寸公弼以指叩壁壁劃然
開其中有人曰何故引外人來公弼曰此雲臺劉法師也可

豐食待之其人遂取一盂水以肘後青囊中刀圭粉和之以
飲法師其味甚甘又以水噴東谷中俄有蒼龍白象對舞威
鳳彩鸞對歌甚清妙頃之公弼送法師回法師却顧見青崖
丹壑餘無所觀矣 續元怪錄

杜懷謙貞觀中道士居雲臺峯之長春石室斷穀不食好吹長
笛令人多買笛一吹卽投于崖下笛盡更供息崖中累月不
動自號長春先生 華嶽全集

韋集唐代宗晝夢一人謂曰太華有黃帝壇祀之當獲大福遣
御史韋君尋訪至山下逢一父老自言是韋高祖隋朝人此
山中韋君滯泣再拜因問壇所在老父曰蓮花中峯西南上

有舌壇彷彿餘址此當是也明日入山行里許至其室見二

樞老父曰此爾祖母及二祖母也相見甚喜遂上山直至

峯西南隅果有一壇韋君洒掃拜謁立標記而迴具以事奏

代宗遣韋君齋手詔入山求覓遂失所在訪山下故老皆不

知韋君慟哭而返代宗悵恨具以事宣付史館 異聞錄

楊外郎隋宗室于姑藏僧契虛遇道士喬君令饋食南山搯子

搯子導遊稚川至翠霞亭見一人坦而瞬目髮長數尺凝

脂黥黑洞瑩心目搯子曰此楊外郎也隋代宗室爲外郎于

南宮屬隋末分磔兵甲大擾因避地居山今已得道此非瞬

目乃徹視也徹視者寓目於人世耳契虛願寤其目搯子請

外郎忽寤而四視其光益著若日月之照契虛惛然汗背毛髮盡勁已而引歸廬于太白絕粒吸氣貞元中徙居華山鄭紳沈聿東行出關東行因暮雨投宿契虛契虛以絕粒不致庖爨二人異其不食而骨狀豐秀問之告以稚川之事後二人重過訪契契不復見矣 宣室志

成道士不知何許人晦名隱迹唐開元末中使謁金天廟尚成真人名遽候之有道士衣敝衣負布囊而來詢其名氏曰姓成延于傳舍問所習不答以騎與之至都密奏之明皇異其說召入館於蓬萊院問道術及所修皆不對未幾期歸出乃攜布囊去人皆笑之後因徹幕見壁上有題曰蜀路西行燕

師北至本擬白日昇天且看黑龍飲渭其字刮洗愈明上問之亦莫知其意不數月果符蜀 真仙通鑑

劉平者天寶中居齊魯間善吐納夜視物不用燈燭安祿山以厚幣致于門下知必不以正道克終遂逃隱於華山 劇談錄

李元明皇時居華山惟採諸藥食之性好酒山下人多以酒飲之忽一日騎一白鹿舉手謂山下人曰我今去遊天台父老三人遮道欲留之元與藥三九二老服之皆一百五十歲王曼者麒麟客張茂實傭僕也茂實家華山下王曼爲之傭五年辭去曰曼本居山家業不簿適與厄會須僱作以禳之今厄盡請辭去家居山景甚可觀能相從一遊乎茂實曰諾曼

乃乘青麒麟令茂實乘赤文虎上仙掌峯居室飲食非人間
有居數日復送茂實至家曰我明日當至蓬萊謁大仙明日
蓮花峯有綵雲東去我之乘也遂揖而去明且驗之果然

續元

栢葉仙人田鸞居長安聞道者有長生術遂入華山求問隱訣

見黃冠指栢樹示曰此卽長生藥也鸞取栢葉爲末服之初

病熱瘡後浴以溫水光彩鮮明自此絕穀尸解

原化記

呂嵩字洞賓世傳以爲東平人或云蒲坂永樂鎮人其自傳乃

京兆人貞元中生於林檎樹下少聰敏日誦萬言及長龍姿

鳳目鬢髮疎秀金水之相頂華陽巾逍遙服貌似張良又似

太史公會昌中兩舉進士不第因遊華山遇鍾離子授延命

之術尋遇苦竹真人授日月交并之法再遇真人鍾離得全

丹之妙年五十道成身長五尺二寸面黃白鼻聳直左眼下

有痣常着白襪衫繫皂緇變化不測遊行人世頗著靈跡宣

和年封通妙真人元至元間贈純陽演正警化真君真君至

華山居文仙谷易姓名姬洞明結庵四十年間人無識者紹

興丙子秋謂門人曰

劉裕之也

張公驪母昇元久矣待吾遂怡然

臥化後神現泗州塔題云姬州墨客羽化三峯又數年復來

庵題詩云昔日曾居此埋名四十春紅塵多少客誰是識予

人又云予曾十載攻文墨萬卷圖書鎖胸臆浮萍雲水寄家

緣住在蓮峯人不識後書回公題裕之發所塵惟見空棺中
有二口字方悟真君所化

真仙通鑑

杜子華不知何地人李虞楊稜遊華山至一小洞高纔三數尺
川崖草樹不似人間行二里有佛堂欲投宿見有紫衣乘小
馬至從者四五人引二人至一府署多竹堂屋甚潔因自言
曰余杜子華逢亂避世遇仙侶居此已數百年矣因止宿飲
食最精內有駝羊其狀如牛留連數日遣使者導之而返
褚乘霞華山道士善驅除素與盧州別駕牛爽善爽為鬼崇殺
其三女而死霞聞之往郡以宅凶廢之霞至入結壇以守日
暮內聞雷霆搜索及明發屋拔木霞謂人曰宵中初有甲兵

與戰鬼敗四散須臾一女子年二十許叩頭謝言是卓女郎
讓之答曰非某過也宿命有數值爽及女命盡且不修德而
強梁誣欺自當爾即命鋤鍾發堂下丈餘得古墳銘曰卓女
墓遂徙于他宅後不復凶矣

通幽錄

王遙刁自然相為友隱華山竇谷之碧雲洞遙字伯遼鄱陽人
有妻無子為治病不用符水針藥或有邪魅作祟者畫地為
獄叩石呼之見狐狸音振蛇之類斬而焚之病者即痊遙有
竹篋令弟子錢哥以九節竹杖擔之十餘年未見開後至華
山崖洞見友刁自然即開竹篋取出五舌竹簧三枚三人共
吹之良久辭去刁自然語曰卿當早來不可久在人世再期

至此同處遙曰諾後王刁錢三人俱登仙刁自然不知何處人所居有三洞上洞人莫能到中洞有飛石遮于洞口下洞隱者皆在其中

華嶽集

李真華山道士岐州王祐家巨萬開館舍以待往來真負藥攜琴往謁說以至道祐驚下拜真乃命酒自酌遽醉而去王令人偵之見真化一大鹿西走不知所之

真仙通鑑

論曰神仙傳稱李八百名真自稱八百歲白鹿先生真豈其化身耶

成生唐昭宗時人其家巨富世居零口伯叔數人其第七叔好道早年冠褐來華山時或暫歸自咸通後不識所在

神仙感遇傳

謝冲寂華山道士好焚香增至三百爐旦夕不飲無香以松栢子代之梁開平三年二月有二青童乘紫雲下云上帝召謝冲寂乃乘雲而去

華嶽志

施無疾不知何地人時往來京索間經歲月不食惟日少飲酒體有青毛治病以水代藥多居華山

真仙通鑑

石晉

張無夢字靈隱蓋屋人號鴻濛子肥遯不仕學窮老易入華山與种放劉海蟾結方外交事陳希夷先生多得微旨著有瓊臺詩集

真仙通鑑

劉昭遠燕山人號海蟾子以明經甲科累遷至上相平昔好說

仙真

三

性命之學有道者來謁問其姓名不答但自稱正陽子以卵
 十枚金錢一文安金錢于案上高累十卵而不墜海蟾子曰
 危哉正陽子曰先生身合俱危更甚于此海蟾頓悟棄家遠
 泛秦川陶真于太華之前頤精煉氣以至成真今山有海蟾
 子道場遺碑 續博物志

元先生華山隱者師事劉海蟾常遊廣陵興化館于賈氏能以
 壤為黃金一旦舉葦席置之溪流跌坐其上泛泛而去不知
 所之 華嶽志

宋

丁少微亳州真源人為道士隱華山潼谷與陳搏齊名善服氣

多餌藥年百餘歲痕強無疾太平興國三年召赴闕以金丹
 巨勝南芸元芝獻 宋史

于慎行讀史漫錄曰宋初有方外之士二人隱于華山其一
 希夷其一丁少微二人以仙隱齊名而同居一山不相往來
 少微志尚清潔而希夷嗜酒放曠若反出其下者然少微應
 召以金丹元芝為獻而希夷之言云云以此觀之少微直金
 丹方士之流而希夷有善卷巢由之致不同口而語矣
 賈得昇希夷弟子希夷卒得昇賈遺詔詣闕進上賜紫服并賜
 號悟真子予錢五百萬俾營北極殿以終搏志先是雍熙中
 搏謂得昇曰吾行老君殿後見神人服黑衣冠云北極開同

紫微帝君汝可以前後所賜市材立北極殿昔唐金仙公主以此為祈真之館今吾復遇北極此觀其興矣乎惟汝當得之逮真宗祀汾睢回再幸雲臺除觀租名對得昇俾建聖祖并真宗本命星官元辰三殿又繪睟容于北壁去搏卒三十年果得昇當之

真仙通鑑

譚處端字正通寧海人偶獲風痺之疾誦北斗經以求濟有感異夢遂精心歸道師事祖師遊歷名山道成屢著奇績以金大定二十一年入華山居純陽洞瘡生于首曰其將死乎眾莫知所對良久曰今猶未也逮生于足則死矣後于洛陽朝元宮之東築庵居之適足生瘡乃遺長短句一編曲肱而逝

至元時封長真雲水蘊德真人 真仙通鑑

王處一海寧東牟人玉陽其號也母夢紅雲繞身而生嘗氣絕仆地因悟生死之理後隱于雲光洞每臨危崖翹足駐立不移者數日人以鐵脚仙目之元仁宗徵赴闕奏對稱旨旋期還歸仍栖華山自號蓮峯逸士編華山志一卷

在金大定二十三年元

延祐五年四月語門人曰羣仙已約我矣言訖沐浴冠帶焚香而逝

華山姚志

劉道寧雲中白登人師事劉柴頭得微旨來華山寓上方白雲官屬歲飢僵餒其志不衰後為道官長于西京與尹清和會于古恒嶽之陽語道寧曰吾近遊陝右奉田侯德柔之命元

宮道宇皆釋人主之惟華山之雲臺地靈物秀實仙家一洞天非君無可托者道寧辭不獲遂遣門人為經營已亦往返大興構造貞祐癸酉中夏田侯修華嶽廟復邀之三四年告成卒于古恒道門稱為真常子王鄂為之記

真仙通鑑

毛養素字壽之家世平水資性冲淡有出塵之志貞祐初一羽客見過風神肅爽養素異之奉事惟謹久之客曰子可教也乃授以秘語問其仙號曰我華山陳希夷也言訖忽失所在自是心神渙釋往禮太華惠照真人田無碍得丹書秘訣清苦二十年與門人常志久興章清華觀迨劉真常掌教賜號願真冲虛真人後居洛陽琳宮主盟師席既而退迹清華未

幾再領朝元棲霞宮事年八十二卒其日朝霞真人見其翱翔于上士大夫作泛霞圖傳于世

甘水仙源錄

元

姜善信韓城人年十九師事華山斬貞常居王才洞元世祖在籓邸聞其名召問事多驗既即位三徵辟奏對多所裨益會建龍門建極宮辭歸勅賜碑并殿閣書額

同州志

白德明字顯達富平美源人母党氏夢白鳳棲庭而生幼穎悟善屬文文獻進士為縣令德明見其執掌拘攣狀力諫去官已亦絕意婚宦棄家為道士居三原龍陽宮復厭囂塵遁迹華山元世祖召入奏對稱旨賜號天光真人

富平志

白守一太山窟溝人自幼禮還元趙真人爲師號碧然子至元四年五月金明不雨碧然子至卽雨當道奏聞勅賜潤澤真人後入華山迺跡一日呼門童囑之曰吾當去矣遂沐浴而逝

延安府志

賀志真字元希隆德人年十四有學道志初師長春高弟呂通明爲全真學年二十四復學于白雲慕君之門三載元理通明至元丙子自隴西來華山于玉泉院西鑿崖以居建全真觀植銀杏一株古藤附焉後于太華之巔鑿朝元洞居之潛心了悟歷諸怪異不爲動尋復緼鐵構道西折而下得平臺崖腹開石室栖焉旣而還長安之栖真庵于大德己亥冬十一月曲肱而逝年八十有八門人歸葬于全真觀西之麓

志

史志經字天緯絳州翼城人貞祐時投真常爲道士丙申清和老仙洎京兆總管田侯議葺雲臺觀勸請真常真常許之遣門人斧荆榛興瓦礫志經與焉不數年完美雲臺道衆邀致住持志經以華山名跡甚多兵戈相尋至于湮沒乃搜奇訪異親歷見聞至古今名士所作碑記表傳詩文期于必得而後已于是作華山志十四卷纖悉備具龍溪孟駕之蓮峯太霞二老三洞講經趙法師并爲序元賜紫衣加號宏正宣義大師王鄂爲作道行錄

甘水仙源錄

褚志通字伯達受學劉真常居上方服氣減食為胎息嗜讀書
熟左氏博議恬愉靜退朝廷聞之使禱水旱輒應賜號佑德
真人提點嶽祠以嶽祠風雨將蹇內出鈔八千鏹完葺易弊
而新過者改觀年八十至元十六年詔中使起之不赴而卒

姚燧為編太華真隱傳 甘水仙源錄

明

孫演書字洞明甘泉人遊華山得希夷先生先天之學預知休

咎後修太和山跌坐羽化 同州府志

陳玉字無壞 一作尚玉朝邑人有仙術能分身知未來事成化間平

陽梁侍御私訪其家答以偈曰我本華山希夷子一轉南庵

去楚州後入華山居雲臺觀土人肖像于觀而祠之 朝邑志

從鉞安陸人正統八年母夢韓湘入室而生骨相奇偉篤好黃

老遊太和山歷嵩華遇異人授大還丹萬歷中郡守阮屏麓

遊太華失路遇屏指引見道貌軒舉問其姓氏年里已百六

十歲矣後入絕巖不知所終 湖廣志

高蓬頭山陰人萬歷諸生棄為道士改名演元遊至河南靈寶

元真庵栖焉一日有老黃冠至蓬頭敬禮之月餘將去出一

枕授之曰此遊仙枕也枕之意欲適無不至焉聊以酬汝徒

居華山谷中蓬頭遊京師時明肅太后崇道教蓬頭欲覩聖

容撫枕枕之夢入宮得謁太后暢陳元秘太后亦于夢中有

感次日差內官物色之見蓬頭微笑遂奏之名入講秘義稱
旨神宗優禮之留數年後還山太后賜道藏三籙勅于上方
建樓供奉又于泉店建報恩觀賜香火地五十五畝蓬頭居
觀內巨儒名卿往往造廬問道焉蓬頭者不冠績髮及肩則
斷之故人以蓬頭呼之自號還虛子

華陰志

程化樂富平人自云化樂真人謫人世故以為名應童子試久
不售遂棄去修道華山華渭人士奉之如圖南著作甚富言
未來事多奇驗歿後有于蜀中遇之者傳言謝故人蓋尸解
也

富平志

劉虛中字長倩號翠峯麟遊人喜讀老子書遂棄家卜居王刁

洞自稱朝來道人洞選元旨蒲州進士陳凝延講道德經于
河海祠儒林重之虛中曰吾生平惟道德經是讀將遍訪名
賢各書一章磨華山之石崖而鐫焉韓相國正人也必先謁
之請書首章以為之倡相國嘉其意即為書之並贈一詩下
八十一章皆得名人手書返栖于洞莫知所終

華陰志

祝仙翁明宗室人也賊亂後來華山為道士居二十餘年年八
十餘一日整衣冠跌坐而逝顏色不改玉柱長垂凡尺餘

華嶽志

李仙翁榆林人不知其名或云曾為邊將有邊卒識之李曰子
誤矣嘗攜一瓢不言禍福間有言即應止欲廟之東廡十餘

年康熙二年八月十二日坐化先一日謝隣人次日人往送之見煮湯沐浴整衣冠跣坐問時早晚有應者曰日午矣舉手謝客倏然而逝眾為建塔于三清殿前

華嶽志

國朝

峯巔道人馬姓真一名不知何里人其出家始末師授之書不可詳偶居于華山之玉刁仙洞在宏正間時已百數十歲以峯巔自號或以瘋顛稱之亦漫應之王刁洞者古仙人王遙刁自然之洞也洞多歷代之勅碑于洞壁模糊難辨此山為華山之枝峯不相附屬洞有三道人居其中其最上者人罕至山故峻南望諸山如牙仗參差下有谷谷中虎豹之迹不絕所飲之水

在洞前曰黃龍樵薪而炊者在山下之東溝溝在谷若斷外之灶陁計其高猶在人間之上十餘里其蔬藥之屬多不知名有松有杏其實可以代糧道人處洞無几無榻因石為床無經書文字無藥物丹爐其弟子常光等柁魯無知不設燒煉黃白及採戰等法不為齊醮符籙等事清淨全真以為教能冬月以雪為沐浴氣蒸蒸如暑居久之人乃稍知其異有某院至使人迎于山一見傾服不能測其道某地旱官迎之于署不立壇不焚香但索酒大飲酒間雨下如注人之知峯巔者日益眾奔走入山者無算問吉凶禍福矢口而答無不奇中

登州志陝西舉人陳上策曾于華山謁之問以後會答曰登州辛未年策果除郡司李時馬再遊登相與別海

仙真

三

上多隱語至登陷方驗抵旅順總兵黃龍問以事率出惡言黃龍怒撻之躍起而走旅順陷黃龍死焉大約所至之處後必有變或叩以儒典能舉五經之要旨或問武則言陣法韜畧

之事娓娓不倦人乃疑其儒而飛遜者然山居不修飾破衣垢面作為詩皆不以格律散于人者不存稿答人書多落落


無首尾字畫縱橫無拘束預言天下事不爽武功志巖仙嘗遊武功醉後登

城樓南面大哭人笑其狂答曰遍地皆殺人血流成河烏得不哭未幾流賊起殺人畧如其言人始信其先見

一日謂其弟子曰將東出關矣旋即去不與人訣亦不知其所在或有遇之于關外者言峯巖事猶奇多不具載李楷文集

范養民字上古號湘濱襄陽人崇正朝太監博涉經史為東宮伴讀鼎革後以黃冠居華山西峯之蓮花坪結茅峯巖日復

庵顧爰武為記後以全真觀無主諸名流延居之名公巨儒時與往還其著作多散佚不傳同州府志



仙真

三

女真

上古

明星玉女修真于華山東峯服玉漿白日昇天後人遂以東峯為玉女峯建祠祀焉

秦

毛女玉姜字正美秦始皇宮人也秦將亡負琴入華山一云殉葬驪山

者避難遇道士谷春教食松葉飲泉水體生絲毛身輕如飛

遂不飢寒常夜拜北斗後人因名其地為北斗坪坪北有毛女峯毛女洞洞中有鼓琴聲嶽師世世見之

劉向贊曰婉孌毛女與時遊遊人與世見之

成延命深吉得意岩岫寄歡琴瑟

投轄錄蔡元長經華山舊聞毛女之異思得一見向曉從者見嶽廟醮爐中有物甚異以告元長丞往視之乃一婦遍身綠毛色如紺碧而髻如漆目光射人顧元長曰萬不為有餘一不為不足言訖而去其行如飛命繪其像祀之

漢

南陽公主漢元帝女下嬪王咸屬王莽秉政主謂咸曰國危世亂但當退身修道必可延年若碌碌隨時恐不免支離之苦咸不從公主遂于華山結廬精思元道歲餘乘雲而去咸入山追之漠然無迹忽于嶺上見遺朱履一雙前取之已化為石因名為公主峯潘安仁有記班志

河北王母莫知其年紀姓氏蓋有道者惟見重白和晉武末和

女真

三

別去元康二年相識人見白和在華山中乘虎從王母三四
人寄謝其親 三洞羣仙錄

唐

金仙公主唐睿宗女明皇妹也景雲元年與玉真公主皆度為
道士築觀京師後入華山于上方白雲峯構舍修道騎鶴上
昇後人因名其地為駕鶴嶺 華陰縣志

何阿六徐州女也嘗居雲臺觀為諸女冠採薪汲水數年諸女
冠因話江吳柑橋美果而秦川難得阿六笑曰此不難致近
亦有之言訖出門食頃袖出柑橋五六枚與諸女冠因言黃
州柑子甚美又致十餘枚分食之後三年有崔鍊師自羅浮

山遊華陰因話及前年廣州官園內有婦人盜採柑子已擒
之忽失所在憶其日月即阿六致柑之期眾始悟其非常人
也 姚志

郭

缺

光陽武女子與同里女楊和光年比未笄棄家投嵩嶺間
始受經籙誓將同穴前史所尚焉遂隱其姓氏默修真仙弟
子莫得紀其先祖官諱乃西入函關緝懷老氏遺蹟 授法
于雲臺觀元尊師曰翔鸞三洞法終光啟道要永願息慮于
斯元宗至道命賜羽服為立王母廟朝禮有位焉壽七十三
歲以貞元七年七月二十八日仙化在光先十五年而逝封
樹廟西南墩上仙澗右地佳勝之氣也 郭氏述真序

乾隆間縣西關烽火臺因啟土得古壙內有古鏡古箭不見遺骸獨存墨書字銘于磚錄以誌之

揚敬真閩鄉田家女也嫁同鄉王清婦道甚謹元和十二年夜靜室沐浴焚香閉戶而坐及旦視之衣服委地若蟬蛻然清不敢動扃戶數日聞房中有人聲開門則婦宛在床矣家人問其故曰初居房中有仙樂綵仗導上華山雲臺峯先有四女在彼曰吾等並捨虛幻得証真仙今當正名宜有真字故名敬真各賦詩道意敬真曰人世從紛擾其生似夢華誰言今夕裏俛首視雲霞既而謁蓬萊大仙伯以侍養王父母辭歸續元怪錄

華山女姓氏不著蓋雲臺峯女冠也昇座說法聲聞朝廷詔召入宮後不知所終韓愈有華山女詩華陰縣志

宋

郭仙姑不知何許人年二百六十七歲曾事陳希夷又嘗隨呂

公遊于世癸辛雜志

韓道姑不知何代人明初猶在俄蟬蛻于太華玉女殿右蛻幾三十年尚不槁腐以杖撻其足亦不僵楊女冠師事之登山記

明

楊女冠妓也年三十入華山居玉女峯師事韓道姑為師竟日夜尸坐惟食松皮值大雪七日不食亦無恙洪武間王履登山曾相見問年七十餘矣華陰縣志

王之良仙傳跋曰神仙之事疑于杳茫故儒者罕言之然宇宙之所有廢之不能也夏商周前三代也羣言折衷于孔子漢唐宋後三代也折衷于晦翁猶龍之設孔子不關不死之谷神脫屣非難晦翁亦信夫飄飄之仙侶何也儒承堯舜以來之統明新兩至道接廣成以來之脈獨善專篤其不可廢與儒均也當今醇樸日漓偷靡益甚其囂凌詬誶之風有目擊而心悸者清淨元默未必非對証藥也吾社友張樵伯氏積學不售暇日搜輯羣仙之係華山者錄成二卷余謂非但為山靈光也上士聞之可以追蹤遠鄉中士聞之守雌斂氣不作塵世囂凌態下士漫不關心與無刻同矣若曰荒誕而

華麓楊翼武燕庭甫評閱

無可信是知出尼山新安上也烏乎可天啟丁卯跋

物產

鳥獸草木不足為山增重而山之不測實于鳥獸草木微之華山靈秘著奇其為神龍神馬瑞草琪花獻瑞當年若不復觀天然珍禽奇獸異草名花以及果蔬藥石之屬足以光前冊而為名山重者亦何可沒也因取物之特出于華及他處並有而惟華為佳者輯物產志

金石爾雅西南之美者有華山之金石焉注黃金礪石之屬

王之良仙傳跋曰神仙之事疑于杳茫故儒者罕言之然宇宙之所有勝之不能也夏商周前三代也羣言折衷于孔子漢唐宋後三伏也折衷于晦翁猶龍之談孔子不闢不死之谷神脫屣非難晦翁亦信夫飄飄之仙侶何也儒承堯舜以來之統明新雨至道接廣成以來之脈獨善專篤其不可磨真儒均也當今醇樸日漓倫靡益甚其羣妄詭詐之風有日擊而心悸者清淨元默未必非對証藥也吾社友張樵伯氏積學不售暇日搜輯羣仙之像華山者錄成一卷余謂其但無可計畧映出夙山滌交上出島平何天烟下浪颯不作塵世驚徒能下士漫不關心與無刻同矣若曰荒誕而

華嶽志卷三

關門李 榕蔭伯甫纂輯

華麓楊翼武燕庭甫評閱

物產

鳥獸草木不足為山增重而山之不測實于鳥獸草木微之華山蘊秘蓄奇其為神龍神馬瑤草琪花獻瑞當年者不復覲矣然珍禽奇獸異草名花以及果蔬藥石之屬足以光簡冊而為名山重者亦何可沒也因取物之特出于華及他處並有而惟華為佳者輯物產志

金石

爾雅

西南之美者有華山之金石焉

注

黃金礪石之屬

物產

球尚書大玉天球注大玉華山之球也

玉前燕錄石季龍使人上華山採藥得玉版

琥珀王處一志嶽頂西南峯上有五粒松下時生琥珀夜即有光如

荷花可書字畫如牛目服之遐舉博物志松脂淪入地中千年

化為茯苓又千年化為琥珀五代史一行傳華山五粒松脂入地千

年化為藥能去三尸

洗石固山經華之首曰錢萊之山其下多洗石注可礪體去垢垢

白石英卉草生華山味甘辛大如指長二寸面如刺白澈有光

握雪礬石响嶼神書此石或在山或在水色白而粗糯至冬月有脂

液出其上且則見日而伏當于日未出時以銅刀刮置器內

采時用白雞清酒祭之華山出

陵石名醫別錄陵石出華山其形薄澤

水晶石王山史仙掌下有穴產石如水晶有五色然脆不可用

以上金石

松王處一志西南峯有五粒松酉陽雜俎作鬣平如偃蓋上有青羅長百

尺癸辛雜志凡松皆雙股故世以為松釵獨括松每穗三鬚而高

麗所產乃五鬚焉今所謂華山松也

松花羣芳譜二三月間抽蕤生花長三四寸開時用布鋪地擊

取其蔬名松黃和沙糖作餅甚清香宜速食不耐久

松子羣芳譜吳瑞曰松子有南松北松華山松子形小而殼薄

有香

栢唐地理志華山生文栢一名黃腸王處一志東北峯上有紫栢葉際有

碧露五月五日以油囊接之食者可作地仙

栢葉化源記田鸞入華山求仙見黃冠指栢葉曰此長生藥也

栢子千金翼方取沉者為末每服寸七漸增三五合欲絕穀恣食

取飽飢則飲水久服延年

檜王處一志黃神谷神姑林松檜數萬株又曰山之西南一林侵天

松檜乃嶽神遊宴之所名黑山林爾雅檜栢葉松身孔氏栢

注栢葉松身

石楠本草圖經生華陰山谷味辛苦葉似莽草色青黃背有紫點女

子不可久服令思男李白詩注石楠生華陰山谷葉如枇杷

無憂樹華山志玉泉院山菴亭大石旁有無憂樹王士正祖香筆記玉泉

院無憂樹四株閣內典頭婆羅王立瞻婆國婆羅門女第

一夫人生子名無憂又生子名離憂其無憂即阿育王也後

王出外國遊戲見無憂樹花極盛王已見此樹與我同名心

大懽喜蓋此樹與青柯坪娑羅樹皆西域種彙苑詳注女子觸之

其花始開

娑羅樹李裕登華娑羅坪舊有娑羅樹大合抱頂如華蓋葉七出

如掌白花綠萼二寸許文翔鳳記娑羅即菩提樹邑志云非菩提

王士正驛程記娑羅坪有娑羅樹王宜輔志今存者名七星樹

寂寞樹太華山筆載聚仙臺南有二檀貼壁并生而末只齊臺名寂

寞樹

龍藤華山聞見錄山蓀亭有龍藤十二天矯多節節皆凹枝榦皆空

相傳為希夷所植

枇杷華山記華山講堂西頭有枇杷園無今

栗華山記西山麓中有栗林藝植以來蕭森繁茂王處一志上方有栗

子林無今

柿華山記朱柿出華山皮薄而甘

以上果木

千葉白蓮王處一志玉井生千葉白蓮花服之令人羽化

布帛爾雅布似布帛似帛華山有之郭璞注草葉有似布帛者因以

為名雍勝畧細辛即古所稱西嶽布是也

萬年松圖書編萬年松出華山

蕙華山志華山有蕙亦蘭類孟雲野謂劍蘭即華山蕙諼花時在

春一榦數花或謂山蘭

以上花卉

芝神農本草經白芝生華山雍勝畧一名玉芝抱朴子山芝者韓眾所食

也與天地相極延年壽通神明宋史丁少微隱華山赴闕以元

芝獻

華筍華峯蔬食譜春間生葉如萱草根色白細削如指長四五寸山

中于初夏掘取儲作蔬食味甘芳稱為華筍

龍鬚縣志在華山可以為蔬

鹿耳華嶽志草屬綠幹有葉歧如鹿耳狀長三五寸四五月間

採食味鮮如苜蓿故一名山苜蓿熟甘美

山藥華州志華陰山藥天下之異品也山產者良吳氏本草秦名玉延

延綏志薯蕷程棨曰唐改為薯藥宋名山藥王輔志薯蕷得石之

精堅而味甘曹毗杜蘭傳食薯蕷可避霧露

百合縣志山產者良王輔志百合花色白六出長莖有香卷丹花紅

而有黑點山丹花小而純紅色葉似柳竹者微苦細葉無子

者味甘食療本草百合紅者為山丹

蕈華嶽志松蕈生松根秋八月間雨後尤多

蓮花菌芝 出華山不常有

雲盤蕻菰 出華山

蓮花白菜 華山者佳

以上蔬食

黃精真仙通鑑道士王暉居熊牢嶺種黃精於溪側福地記日食三寸

絕穀不飢久之度世陶先生謂之西嶽佐命是也

茯苓唐本草茯苓第一出華山蜀本草惟華山最多形垠無定以似

烏龜者為佳華山志嶽頂五粒松下生茯苓具如人形後山叢談毛

女峯有隸刻曰茯苓諸山皆假惟此者真一旦一九三三

升疑為服茯苓法也

木抱朴子

南陽文氏其先祖漢中人值亂逃華陰山中困飢欲死有二人教之食术遂不飢後還鄉里顏色更少氣力轉勝故

术一名山精神藥經曰必欲長生當服山精

細辛雍勝器

細辛坪在嶽頂東南隅方圓三四畝盡是細辛一曰少辛服之令人遍體生香沈括筆談華山細辛極細而直深紫色

味極辛嚼之習習如椒而更甚

菖蒲華山志

嶽頂東南隅菖蒲池其菖蒲葉細如劍脊根每寸九節服之令人強健延年益壽本草韓藜服菖蒲十三年目視萬

言冬袒不寒按韓藜即韓衆運斗一名堯韭一名昌陽

禹餘糧本草

禹餘糧出華山禹常採此當糧根如蓋皮如茯苓取以當穀不飢博物志禹餘糧是還魂石中黃子鬼神禽獸守

之不可妄得所謂節也七月稔熟食之如大麥

靈豆貴耳集

華山陳希夷有大靈豆服一粒四十九日不飢筋力如故顏色如嬰兒

沙蓂唐本草

沙蓂出華山者為善威靈仙本草圖經出華山葉似柳花淺紫根生稠密冬月丙丁戊己

日採以不聞水聲者良

石葦本草

生華山谷石上味甘溫一名石皮葉如柳背有毛而斑點如皮以不聞水聲及人聲者良

赤地利本草惟華山者佳春夏生苗作蔓繞草木上莖赤葉青

七月間白花結子青色根苦莖皮紫赤肉黃赤味甘平

天門冬本草天門冬一名顛勒味苦殺三蟲在華山名松管以上

五色鶩華山志牛心谷其山岩間多五色鶩鳥

三青鳥王處志焦道廣居雲臺峯有三青色鳥報未然之事

避株禽經有鳥名避株頭有綵囊張華注此鳥出華嶽天晴則出

綵囊遇樹木則避之故名

鳴渠西山經松果之山有鳥焉其名鳴音渠其狀如山雞黑身赤

足可以已曝郭璞注謂皮皺起也陸德明經典釋文云即鷓鴣也

羝羊西山經錢萊之山有獸焉其狀如羊而馬尾名曰羝羊其脂

可以已腊郭璞傳羊六〇王尺謂之羝輔志似羚羊色青其角有掛痕者爲

羚羊無者爲山羊

羚羊王輔志細角有圓紋夜則懸角木上以防患山中人僅一見

也名醫別錄羚羊角出華山谷

牝牛西山經小華之山其獸多牝牛郭璞傳今華山中多野牛山羊

肉皆千斤牛即此牛也

以上鳥獸

肥蠶西山經太華之山有蛇焉名肥蠶六足四翼見則天下大旱

湯時此蛇見陽山下

鼪鼠漢中府志褒城縣北乾龍洞中達華山洞約三十里其中飛鼠

如鳩西京賦注鷗鼠狀如小狐肉翅飛且乳

以上昆蟲

華嶽志卷之四

關門李榕蔭伯甫纂輯

華麓楊翼武燕庭氏評閱

金石

華山金石自古稱富周劔漢鼎尚矣石刻之見于歐陽集古錄及華嶽題名跋可考也慨自黃巢寇火有明地震石遂遭劫然猶未甚也至嘉靖間修廟之役捶之鑿之用代碑甃而古碑遂不可問矣

國朝康熙間王山史楊得九十二人其他可考者惟嗜古之士摩挲斧餘錄記數字於簡編爾乾隆間畢中丞沅督修嶽

廟拆取摹榻凡一石一字悉收之關中金石記俾以殘石聚嵌廡壁而無知胥匠捶鑿紛亂莫得首尾且多委棄寥寥殘石又一厄矣因取今之所存及見于簡編之可述而識者輯金石志以為仰止高山之一助云

周劍

古今刀劍錄 周昭王瑕在位五十一年以二年歲次壬午鑄五劍各投五嶽銘曰鎮嶽上方古文篆書長五尺無今

漢鼎

古今刀劍錄 漢宣帝元年于華山仙掌鑄一鼎高五尺受四斗擬承甘露刻其文曰萬國服貽長久鑄神鼎承天酒三足小篆

漢劍

古今刀劍錄 漢武帝元光五年歲次乙巳鑄八劍長三尺六寸銘曰八服小篆書嵩○霍華太山五嶽皆埋之

晉劍

古今刀劍錄 孝武帝昌明以大元元年于華山頂得一劍銘曰神劍隸書

玉版

晉書 石季龍使人探策于華山得玉版文曰歲在申酉不絕如縷歲在壬子真人乃見燕人咸以為慕容儁之應也

秦刻

韓非子

秦昭王令工施鈎梯而上華山以松栢之心為博箭長八尺棋長八寸而勒之曰昭王長與天神博于此又趙主父命工施鈎梯而上廣三尺長五尺而勒之曰主父常遊于此

漢華山廟碑

集古錄

漢西嶽華山廟碑文字尚完可讀其述云孝武皇帝修封禪之禮巡省五嶽立宮其下曰集靈宮殿曰存仙殿門曰望仙門中宗之世使者持節歲一禱而三祀後不承前至于亡新寢用坵墟建武之元事舉其中禮從其省但使二千石歲時往祀自是以來百有餘年所立碑石文字磨滅延熹四

年宏農太守袁逢修廢起頽易碑飾闕會遷京兆尹尹府君

到欽若嘉業遵而成之孫府君諱珍其大畧如此隸釋西嶽華

山廟碑篆額在華陰縣威宗延熹四年袁逢守宏農郡以華

嶽舊碑文字磨滅遂按經傳載原文勒斯石以垂後會遷京

兆尹乃勅都水掾杜遷市石造書佐郭香察書碑成于後之

四年蓋孫珍典郡時也隸續華山廟碑篆額二行碑二十二行

行三十七字袁府君肅恭明神及京兆尹勅杜遷市石皆平

開高祖太宗孝武并列行高出一字有紋如碁局石墨鐫華郭香

察書者察蒞他人之書也又唐徐浩古蹟記以為蔡中郎書

此碑嘉靖中尚在一縣令修嶽廟石門視殿上碑題皆當時

顯者恐獲責此碑年久遂碎為砌石

顧亭林金石文字記

華山廟碑舊

在西嶽廟中嘉靖三十四年地震碑毀華州郭允伯有此拓

本文字完好今藏華陰王無異家其末云杜遷市石郭香察

書東漢人二名絕少察書乃對上市石之文則香者其名而

特勘定此書者爾又律歷志有太史治歷郎中郭香豈其人

歟

睽書亭集

漢華山碑跋漢隸凡三種一種方整鴻都石經尹宙

魯峻武榮鄭固衡方劉熊白石神君諸碑是已一種流利韓

勅曹全史晨乙瑛張表張遷孔彪孔佃諸碑是已一種奇古

夏承戚伯著諸碑是已惟延熹華山碑正變乖合靡所不有

兼三者之長當為漢隸第一予生平僅見一本漫漶已甚今

觀西陂先生所藏文特完好并額具存披覽再三不自禁其

驚心動魄也

王山史山志

余有郭香察書華嶽碑帖為郭宛委遺

物沈繹堂見之絕賞遂為跋云華陰王子山史博雅嗜古所

藏定武蘭亭率更醴泉舊榻皆精微入妙而郭香察隸書華

嶽碑尤冠絕今古碑毀已久海內僅存此本山史居近名嶽

又與郭東諸君游鑿精識遠授受矜重巋然與三峯並峙伊

可珍也

金石遺文錄

漢西嶽華山碑延熹八年四月八分書字方

今尺一寸在西嶽廟中前于靈帝光和元二年衛覬樊毅所

立碑十三四年獻帝建安時張昶所立者四十年其書凌鏤

前修雄視後起筆墨所到妙莫形容或揮運暢達以宣其氣

或蟠夔屈縮以養其神瘦筋隱骨豐肌流潤收陳流之寬縱廓烏氏之方嚴爲獨絕也余六經華山求諸漢碑則盡亡矣惟郭允伯所藏郭香察書拓本乃趙子函舊物授諸華陰山史宏撰山史館余嶽前堡告余曰已輔昇淮浦張力臣余遇力臣弟訊之不獲甲申臘月道經邗上從舊友張儀一處得允伯山史原物驚愕喜慰噫嘻非嶽碑有靈何卒如我願見之懷也

王輔志

華山廟碑郭香察書海內有二本一不知所在

一在一等候張公家先君舊藏郭委宛裝演

附錄 翻刻漢西嶽華山廟碑 雍正元年如臯姜任修以王無

異本摹勒上石 乾隆四十三年學士大興翁方綱手摹足

本商邱編修陳崇本校刊上石 跋 乾隆甲午冬吾友朱竹

學使自江南歸以所得王無異藏本見示卽所謂闕一百五字本也予借來齋中殫十日思力并諸跋鈎摹裝爲冊此本明萬厯中藏華州東肇商雲駒蔭商雲雛兄弟之墨莊樓雲雛以贈郭宗昌允伯允伯號沚園又號宛委山人所居有松談閣其家僮惠靈偃史明二人善裝演于天啟四年重裝今此摹冊尺寸悉依之也入

國朝歸華陰王無異宏撰嘯月樓康熙八年攜至京師明年庚戌自跋于後後歸歛之何氏乾隆丙戌歸徽州學官上海黃文蓮星槎後七年癸巳星槎以歸竹君吳江陸蘆墟自識其

臨本云予得華山碑雙鈎本于顧南原家謂從商邱宋尚書
 摹得其原碑卽華陰王無異家藏本南原隸辨亦云爾予從
 商邱宋尚書摹得之卽無異藏本也方綱既借竹君此本鈎
 摹爲冊亦遂信爲卽商邱藏本矣今年戊戌五月曲阜桂未
 谷從顏氏家得金壽門雙鈎商邱家藏本則凡王無異本所
 闕之字此皆有之因更爲鈎摹一本又借竹君本來細較別
 摹其副以寄陝西中丞畢公秋帆俾勒諸祠下旣而以商邱
 詩核之則所謂宋榻僅缺十字者蓋卽此本也而顧陸所謂
 文字完好者亦卽此本也是商邱之本缺十字王無異本缺
 百五字判然二本同在人間實無可疑者但未得缺十字之

本快一對臨爲憾故姑就壽門雙鈎本補入王無異本以成
 全璧延平劒合終當有日爾乾隆戊戌秋七月九日北平翁
 方綱識

樊毅修西嶽廟碑

集古錄 漢樊毅華山碑字畫頗完其文彬彬可喜惟周禮職方
 氏職字作識字其字畫分明非訛闕疑當時周禮之學自如
 此蓋識誌其義皆通也治平元年五月十日書金石錄 袁逢碑
 亦引職方氏乃用識字蓋漢人簡質字相近者輒假借用之
 初無異義爾隸續 樊毅碑無額凡十九行行三十五字高祖應
 道出碑一字亦有碁局之文

華山亭碑

隸續華山亭碑篆額二行碑十六行行三十三字西嶽至尊平

關皇帝永思高出一字王宜漢華山亭碑光和二年衛顓書

今廢隸釋云張昶分書非按牟準作衛顓碑陰文有華山下

亭碑及他碑並顓金石鉞八分書也等語見金石古文

修西嶽廟復民賦碑

漢隸字源樊毅復民賦碑光和二年立在華州碑久湮沒唐興元

元年華陰令盧倣求得而為之記八分書于碑末

華嶽碑

金石韻府華嶽碑篆文八十四字

西嶽神道闕

華陰縣志西嶽神道闕五篆字刻在石人胸前雖剝蝕尚倣佛可

辨今在西嶽廟中

華山堂闕碑

華山經辨華山堂闕碑銘漢張昶撰一作張旭傳本出古文苑今

作衛顓姚志古文苑書者為張旭秦藻幽勝等作張昶又重出

作衛顓當以昶為是考碑文此廟蓋合祀河嶽之神而堂闕

乃王者行禮之所以避雨露服段煨實創為之耳

石闕碑

水經注華陰有漢魏文帝三廟廟有石闕數碑一碑是建安中

立漢段熲更修祠堂碑文漢給事黃門侍郎張昶造昶自書之元帝又刊其二十餘字二書存重名于海內又刊侍中司隸校尉鍾繇宏農太守母印儉姓名廣六行蔚然循平是太康八年宏農太守河東衛叔始為華陰令河東裴仲恂役其逸力修立壇廟夾道樹柏迄于山陰見永興元年華百石所造碑書華嶽廟前一碑建安十年刊也祠堂碑昶造并書後鍾繇鎮關中書此碑後云漢故給事黃門侍郎華陰張府君諱昶字文舒造此文又題碑額云時司隸校尉侍中東武亭侯穎川鍾繇字元常書

西嶽石闕銘

西嶽石闕銘云永和元年五月癸丑朔六日庚午農太守常山元氏張勳為西嶽華山作石闕高二丈二尺其後為韻語文辭頗怪又字多假借時有難曉處永和漢順帝晉穆帝姚泓皆有此號穆帝時華陰不屬晉以此碑字畫驗之恐非姚泓蓋漢制也

張昶碑

張懷瓘書斷張昶八分書在華陰今華山碑所存漢碑凡四

漢殘碑陰

華陰縣志漢殘碑陰石一塊有武都太守故功曹等名分書古勁七行存四十字不知何碑之陰近又于道院草叢中得一分

書殘石亦七行四十餘字有池陽運勺諸處人名書之大小與前石同試以兩石接合校對其為一石無疑第一行第一字擦損下

故武都太守缺二字似吉躬寧節第二行第二字故功曹司隸茂才司

空掾池陽郭暉公休第三行第二字故功曹司空掾池吉華伯昉第四行

故功曹司空掾運勺田巴叔鸞第五行故功曹司空掾池陽吉

充叔才第六行故功曹太尉掾頌陽游殷幼齊第七行故功曹太

尉掾池陽吉苗元裔下截僅存四故字不全二字餘悉斷毀

按袁逢樊毅二碑隸續云俱有某局文殘石二塊亦某局文

或是二碑之陰歟惜不可考矣

後魏大代華嶽廟碑

集古錄大代修華嶽廟碑按魏書文成帝興光二年三月己亥

亥改元為太安故魏書興光無二年而此云二年者蓋立及

後六日始改元也金石錄以始封代土改稱為魏故代魏兼用

猶彼殷商蓋國號雖稱魏而猶不廢始封故兼稱代爾王宜輔志

後魏大代興光二年修華嶽廟碑今廢

後魏華嶽碑

金石錄三百廿一王宜輔志魏華嶽碑劉元洲書今廢

後周華嶽廟碑

石墨後周華嶽頌碑碑文萬紐于瑾造趙文淵書按瑾賜姓

史稱其著碑頌數十萬言此其一也而文詞殊無超拔其稱

趙文淵云雅有鍾王之則筆勢可觀宇文泰時命文淵與黎季明等刊定六體管至江陵書景福寺碑梁主稱之又以題榜功增封邑除郡守後雖外任每須題榜輒復追之竇臯賦云文淵孝逸獨慕前踪至師子敬如欲登龍然則文淵在當時固自知名此碑天和二年造正其書路寢等榜後也故官稱趙興郡守云碑字小變隸書時兼篆籀正與李仲璇孔廟碑同亦褚河南聖教歐陽蘭臺道因之所由出也江陵景福寺不知存否此碑完好回文淵之幸也文淵史避唐諱作文深

唐李靖告西嶽碑

石墨鐫華唐李靖告西嶽書此好事者誣衛公而為之書詞可笑而劉餗言衛公訴神且請告以官位詞色抗厲后有聲曰僕射好去迴顧不見後果如所言以此觀之真有是書也又小說載公射獵行雨事殆異人不可以常理論也書三種潞州者崇寧間刻藤縣者紹興間刻西嶽廟則近刻筆亦適逸王元美稱之當是潞州本藤縣者不及近刻又下矣

秦皇觀基浮圖銘

金石文字記 喬師望撰并八分書上元二年七月此當在華山西峯今不得其處基字不諱而文有甸奴○獵關塞○清越裳奉贄風塵不驚知其為前上元也師望時為華州刺史

華嶽精享碑

石墨 華嶽精享亭開元帝遣蘇頌禱雨有應而建也作者為

主簿咸廩書者為御史劉升金石畧僅二碑而遺此今觀其
隸古勁逸有漢人遺意五代以降求此一批法不可得矣

金石文 碑在西嶽廟中即刻于後周天和二年頌碑之陰

元宗御製華山碑

關中金 元宗華山銘今只存駕如陰孕四字駕如者仙駕如

聞句也陰孕者陰陽孕育句也碑為黃巢所燬故自歐趙以
來不著錄

述聖頌

集古 唐述聖頌達奚珣撰頌呂向銘并正書金石文 正書在

華嶽廟東道院王立 此頌元宗御製碑也然其言樹之平地

巖若斷山遂為碑識矣

昭告華嶽碑

石墨 昭告碑韓賞撰文韓擇木書擇木以八分名昔人評之

曰雖姿字不至峻茂而嚴正可畏杜子美云尙書韓擇木騎

曹蔡有隣開元以來數八分觀此碑良是碑文韓賞為補闕

禱華山而作大要與神盟欲忘身奉國其詞則無取焉金石

文 在述聖頌碑陰之右方首云惟廿七祀孟秋右補闕韓賞

敢昭告于太華府君祠廟其末云天寶元年歲次壬午四月

乙亥朔十日甲申諸王侍書榮王府司馬韓擇木書縣志文廿
行行十五字擇木退之同姓叔父賞名見御史臺精舍題名
記及石柱郎官戶部員外郎題名

西嶽大洞張尊師碑今廢

集古錄張尊師碑王延齡撰李慈書慈書體兼虞褚而道麗可

喜當時未見稱于世遂至泯滅于後尤可惜也

按縣志云開元十四年立

華嶽碑堂修飾記碑

金石錄衛包撰并行書天寶九載

雲臺觀主張敬忠碑

金石錄張思遠撰郭懷漸書天寶六載

金天王廟靈異述

金石錄衛包撰并正書天寶九載四月

雲臺觀金錄齋頌

金石錄衛包撰并篆書天寶九載四月立

雲臺觀修三方功德頌

金石錄衛包撰并篆書天寶九載四月在華州

祈雨記

大唐中興克復兩京後乾元元年因兩月不雨至于明年春
朝散大夫使持節華州諸軍事務檢校華州刺史平原郡開

國公賜紫金魚袋張惟一與華陰縣令劉曷丞缺岫丞員外

置同正員李綬主簿鄭鎮尉王某尉高佩尉崔缺陽于西嶽

金天王廟祈請初發言雲興倏登車雨降蓋精意所感致明

神應期庶缺賴缺之能不慚方伯之事時二月十日題紀前

金州刺史李權書金石文字記 祈雨紀張惟一撰李權八分書乾

元二年二月今在述聖頌之左旁

華嶽廟古松詩碑

金石錄 衛包撰并篆書

賈餗華嶽廟詩刻

金石文 字記 賈餗謁華嶽廟詩正書元和元年十月五字十八韻

刻于後周天和碑之左旁

修華嶽廟碑

縣志 碑久亡撰書人皆不可考華嶽全集注作者為李商隱

華山使君院石柱紀

王宜輔志 李商隱撰今廢

裴穎修嶽廟中門紀石

長慶元年缺十三日朝散大夫行華陰縣令上柱國裴穎奉

勾當再修中門屋至廿五日功畢關中金張從本正書長慶

元年刻穎衛尉卿駙馬都尉

禱神記

華嶽志

卷四

三

缺臣為國討叛思缺丹懇敬祭敬拜缺陳所期感通昭鑒不

昧列旌旗于綠野羅缺劍于明庭共展禮容因以題記太和

二年八月廿八日 正書左行

宋陳希夷福壽碑

碑二各書一字字徑三尺許鐫陳搏書三字今在嶽廟內墀

旁山東青州府雲門山石壁亦鐫有希夷所書福壽二字字

形較小體亦別

希夷無極圖

朱尊彙太極圖授受考陳搏居華山曾以無極圖刊諸石為圖者四位

五行其中自下而上初一日元牝之門次二日鍊精化氣鍊

氣化神次三五行定位五氣朝元次四陰陽配合日取坎填

離最上曰煉氣還虛復歸無極故謂之無極圖乃方士修煉

之術耳相傳呂崑受之鍾離權權得其說于魏伯陽伯陽聞

其旨于河上公

賜西嶽廟乳香碑

石墨鐫華高紳轉運荆湖奏請勅賜南嶽焚香而四嶽并及之據

碑南嶽諸殿曰破乳香一兩西嶽諸殿共十一處乃曰破半

兩古人焚香其儉如此且所焚乳香非今香也碑真書亦有

柳誠懸筆意王宜輔志乳香碑韓見素撰智通書

修造靈寶三籙壇記

碑碣

景德二年冬十一月龐奎正書

晉國大長公主祈福記

大中祥符巳酉十月立賈得昇正書

關中金石記

大長公主卽延

慶公主下嫁石吉以淳化元年改封卽以是年十二月薨逝

悟真大師賈得昇陳希夷弟子文內又有張德○應是張德

昇見麗房報祀記

韓國長公主建醮記

在乳香碑右側上下兩方

上方大中祥

符三年歲在庚戌三月庚辰

缺

七日丙戌入內侍省內侍

高班張懷則奉宣爲韓國長公主

缺

災祈福

缺西嶽廟請道

士二七人修建靈寶道場

缺

散日設五

缺

謝恩大醮

缺雲臺

觀悟真大師賈得昇題

下方

八內侍省內侍高班張懷則

爲韓國長公主疾愈承命再來禱謝靈嶽請道士二七人開

啟靈寶道場三晝夜散日設清醮壹座行事

畢而退大中

祥符三年四月

缺

八日悟真大師賈得昇題紀

盛亮募勒御書碑

皇帝祀汾陰明年三月立正書

紫微觀碑

在中方下竹林中宋大中祥符建醮碑今華山村卽觀址

神迹碑

缺

京官勾部送御製御書奉神迹碑石壹片赴西嶽廟殿上

西畔於天禧四年十月二十七日巳後午前丙時豎立訖故

記之入內侍省內侍殿頭鄧缺

修蓋嶽祠記

大觀巳丑修蓋嶽祠缺月十一日經始越缺孟春廿九日成

之缺城使董宗師部缺侍禁寒敏三班借缺從善受給從缺

孺刻石

拱極觀碑

易曰神而明之存乎其人本觀舊記爰自靖康改元中初奉

大夫薛公所作刻諸瑰瑋意欲傳久昨緣兵革遽起大火繼

焚致于泯滅其文則道之竊嘗錄之以行逮今十三載矣經

曰天地運度有數而不失也道之雖至愚緬思景賜得非真

君之密贊耶謹募工重刊于石恭銘休美云時紹興九年歲

次巳未中元日前西嶽知殿拱極觀主賜紫道士雷道之謹

記金石文右小碑本在拱極觀觀已久亡萬歷中有人培地

得此碑置之嶽廟中與宇文周碑並立其碑文淺鄙無足採

然吾于此有以見宋人風俗之厚焉夫紹興九年高宗方在

臨安而金人有許和之約考之于史八年十二月丁丑詔金

國史來盡割河南陝西故地通好於我令尙書省榜諭九年

三月丙申王倫受地於金得東西南三京壽春宿亭曹單州
 及陝西西京之地四月辛亥命樓炤宣慰陝西諸路十年五
 月金人叛盟陷永興軍則此地之復歸于宋蓋無多日雷道
 之一道士耳能于干戈喪亂之際而繫思本朝詞微旨切以
 視夫士大夫之覲顏臣僕者不大有逕廷耶余見朝邑藏春
 鳴之記稱阜昌癸丑而西安學有華夷圖刻亦稱阜昌七年
 以偽齊劉豫之號而欲壽之貞石豈不見此文而媿死也古石
 玕靖康元年八月三日薛存撰文紹興九年己未中元日道
 士雷道之跋權詵書道士楊子淳楊道誠上石王文友刻字
 碑廿七行行五字額四字篆書

金仙脫瑩碣

金太素庵道士雷道昇收庵道流遺骸葬于牛心谷內名曰
 仙脫之瑩大定二十七年八月立石范若水撰文邑人孫肯
 堂正書徐安上篆額碑陰前知雲臺觀事兼監管道士楊知
 其前知觀事道士楊昌銳監齋道士張處性知觀道士關昌
 按大定二十七年宋淳熙十四年也此碑先在牛
 心谷後移于雲臺觀乾隆四十年間猶在今亡矣

元朝元洞碑

終南山人洞元子井道泉撰文翰林修撰同知別誥兼國史
 院編修官承務郎陝西道監察御史李臯書朝請大夫西蜀
 四川道肅政廉訪使集賢學士兼國子祭酒楊演篆額元秦

定二年乙丑立石

明重修雲臺觀碑

賜進士出身中憲大夫四川按察司副使前吏部文選司郎中翰林院庶吉士涇上南軒譔賜進士出身中憲大夫整飭潼關等處兵備兼關內道陝西按察司副使前刑部郎中海隅蕭應宮書賜進士出身大中大夫整飭海蓋等處兵備兼管苑馬寺事山東布政司左叅政前戶部郎中華陽郭性之篆萬歷十九年八月十五日

寇平祭告碑

崇正六年正月初九日陝西巡撫練國事同潼關道張維世

勒石華州諸生郭宗昌分書在嶽廟內

太華山記石幢

在嶽廟內東廊李攀龍譔郭宗昌隸書幢凡

八面六面書記餘二面則縣令董盛祚跋正書跋右記爲歷

下李公作世習見之分隸刻石則始咸林郭宛委徵君也書

旣結體入微與曹全碑神似鐫復精所謂星流電轉纖踰植

髮殆能近之相傳其所自琢將植之白帝宮以捨壤未果余

詢之華人云徵君好古淹博蕭然高寄獨酷嗜金石古文攷

其源流區別真贗所鑒定藏之家者比歐趙生平精書法尤

奸作八分沉酣漢隸心摹手追備臻其妙議者以倡明復古

與修武起衰同功甚可傳也久之石失所在亳州刺史劉公

潤生覓得之輦致沁園園卽徵君舊徜徉地也余攝篆咸林因與劉公之子元敬孝廉遊過其園彷彿遺概裴回不能去摩挲此石商確位置宜與述聖精享諸珉並峙庶幾可承其傳遂載移諸嶽廟中樹焉元敬慨然曰次山作中興頌清臣爲之書永叔序集古錄君謨爲之書書誠可託以久倘處非其地安所得不朽乎徵君往矣疇昔之愛玩盤桓者物與地皆久非所有而此石獨存且不載姓名闕于後意必有所待不逢明府共何能全余曰物之神也未易磨滅固將藉名山而傳且徵君志余何庸焉因識歲月于此 皇清康熙二十七年歲在戊辰季冬月華陰令燕山董盛祚題

國朝創建朱子祠碑

賜進士及第經筵講官監修明史左都御史徐元文撰書者爲王宏撰不載姓名 康熙二十四年八月立 又有四十四年重修碑李二曲撰王宜輔書

嶽廟殘碑

縣志石分爲三存一百七十餘字文不可讀無年月可攷惟權匪撰文杜繹書尙可辨按宰相世系表匪爲德輿之祖故附置於此杜繹分書類蔡有倫

主簿常冀尉元撫殘碑

缺懸 缺 昭應 缺 十方達婁宗臣之 缺 如在永事明神 缺 主簿

常冀尉元撫 史子華刻

以前碑碣以後題名

李播題名

隴西李播十月十五

缺

華陰縣志

李播淳風之父華山道士其

題名或在武德貞觀間

馮總題名

王宜輔志 唐開元二十二年平淮將佐華嶽廟題名碑馮總八分

書今廢

李愔題名

鄭縣尉李愔以開廿四年六月六日充勅簡募飛騎使判官向陝虢州點覆其月十四日事了回便充京畿採訪使勾覆

判官此過赴京

縣志 右在周天和碑左側李仲昌題名下開廿四應即開元廿

四年也正書

蘇穎題名

開元廿六年八月二十七日朝請大夫 缺 守別駕臨潼縣開

國男蘇穎從內史奉勅祭

縣志 在周天和碑左側孫廣題名下正書文左行惟郊社丞蘇

爰記六字右行然別在一處字不相續以字體相同故附于

此

顏真卿題名

皇唐乾元元年歲次戊戌冬十月戊申真卿自蒲州刺史蒙
 恩除饒州刺史十有二日辛亥次于華陰與監察御史王延
 昌大理評事攝監察御史穆寧評事張澹華陰令劉暄主簿
 鄭鎮同謁金天王之神祠顏真卿題墨林快事顏真卿題名跋太
 師字今完全者多然率矜莊修飾惟此與家廟二碑乃直致
 自然盡唐人制舉習氣蓋家廟情至此又一時懸筆書尤見
 本色家廟榻多時有損而此更如新當為顏帖之冠行書如
 自題像行草如爭坐位皆壞寶也天啟辛酉丁前一日金石
 文字記華嶽題名顏真卿大字正書乾元元年十月今在華
 嶽碑之右旁王伯厚言華嶽題名五百十一人再題三十一
 人自開元訖清泰今存者惟此與述聖頌二碑不過二十餘
 人而已又因地震之後以碎石裝砌嶽廟大門牆上亦有唐
 人題名今王無異所榻得者通共九十二人有裴士淹李德
 裕李商隱名

李樞等題名

大唐上元元年冬十有二月十一日同謁嶽祠書記上截篆
 書華陰令王宥前令王紆丞王沐尉李齊佺尉權頌鄭縣主
 簿張彬尉竇彧下邳縣丞李演尉邢涉處士王季友張彪著
 作郎孟昌原京兆府法曹參軍李樞書并篆下截分書金石文字
 記華陰縣令王宥等題名在述聖頌碑之右旁上為篆下為

八分書唐有兩上元年號此則在肅宗時也

關中金石記 樞李權

弟述書賦法云李權淮安王神通曾孫工八分弟樞工小篆

內有處士王季友即杜甫所稱鄴城客子是也豫章圖經云

季友鄴城人家貧賣履博極羣書李勉引為賓客甚敬之攷

書史會要李樞唐宗室官侍御史工小篆楷古篆又上方謁

嶽二字旁有鄭縣丞鄭翊五字按唐宰相世系表鄭翊官至

宋州司戶參軍

太州別駕題名

關中金石記 按文只十三字云正議大夫太僕少卿兼太州別駕

縣志 在告嶽碑之後無歲月可攷按漢書地理志華州上元二

年改名太州寶應元年復故名則是題為肅宗時人矣

邱據題名

陳鄭澤潞等州節度行軍司馬殿中侍御史邱據再隨使主

赴上都朝謁往來皆虔拜神祠時寶應二年六月八日記

劉士深題名

前藍田縣尉劉士深前奉天縣尉劉士清京兆府倉曹參軍

李迪前告成縣丞李缺述下邳縣尉李遠時廣德元年三月

記

韋勝題名

銀青光祿大夫守太常卿缺持節延州都督侍御史上桂國

岐陽縣開國男韋勝以廣德二年二月十七日越自師旅將

朝廷

缺

明神式祈景福與

缺

琇

缺

同謁

按此與韋那
題名同一碑

孫廣題名

朝議郎行下邳縣丞孫廣試衛尉少卿田遇廣德二年六月

十三日記

古石
琅玕

右題名正書在天和碑左側賈餗詩之下此

在李仲昌題名前應有題名想為仲昌等所磨故此廣德二
年六月字內微有縣尉呂○同謁神數字尙可見

李懷讓題名

關中金

右只存三行每行七字共二十一字首行云軍兼同

華兩州節次行云卿使持節華州諸三行云丞上柱國沂國

公考唐常袞華州刺史李公墓志云公諱懷讓以佐命功特

授鎮國大將軍加特進兼鴻臚卿封沂國公充潼關鎮國軍

使同州等州節度使華州刺史以廣德元年九月薨于華州

軍府詔陪葬建陵則此乃懷讓題名也

韋澣等題名

朝議郎

行

行太子司議郎兼華陰縣

缺

李仲昌

行

丞田遊業

行丞同正韋澣

行

主簿韋浣

行

尉崔頌

行

尉王卓

行

尉蘇懷

陽廣德

缺

四月韋澣書記

關中金
石記

宰相世系表云澣官昭應

令按此云行華陰丞同正當在未為昭應令之先崔頌終同

州刺史

韋公右等題名

行 令韋公右 丞同正韋澣 尉李貺 尉劉缺 舊校書郎

廬舒○按公右等四人廣德中同官華陰此卽其時所題也
裴穎等題名

朝散大夫行華陰縣令上柱國裴穎華陰縣丞薛仲歸華陰
縣主簿黎煉華陰縣尉高懿華陰縣缺

焦緩題名

前大理司直焦緩與緱氏縣焦琳華州司倉參軍焦賁永泰
元年缺 春同遊此廟

第五琦題名

前相國京兆第五公自戶部侍郎出牧括州子聳關內河東
副元帥判官禮部郎中兼侍御史虞當自中都濟河于華陰
拜見從謁靈祠因紀貞石時大唐大歷五年六月四日司勳
郎中兼侍御史李國清倉部員外兼侍御史張曇大理正兼
監察御史王勣又衛錄事參軍第五準缺關中金石記 前相國第
五公自戶部侍郎出牧括州蓋坐魚朝恩黨貶也又云子聳
虞當子婿之稱自此始婿作聳者子祿字書云聳聳婿上俗
中通下正婿一變爲婿再變爲聳三變爲聳四變爲聳皆由
胥變爲聳致悞又聳或亦寫作聳故月耳相溷

裴士淹題名

題名

三

禮部尚書裴士淹出為饒州刺史大歷五年六月六日於此

禮謁關中金石記士淹之出亦坐魚朝恩黨見唐書朝恩傳

蔣羅漢題名

內供奉開國公上柱國賜紫金魚袋蔣羅漢

蘇敦兄弟題名

缺州司馬蘇敦弟華陰縣令發弟咸陽縣主簿缺弟前華原

縣丞徹弟太常寺主簿徹弟禮部常選徹弟少府監主簿教

弟儼時年十二大歷中發任華陰縣令時禮部尚書河東裴公出

牧鄱陽敦與發徹同送至此拜謁金天便過東驛不避炎暑

亭午而回故列名于前刻石題記五年夏六月六日古石映正

書在昭應碑之下

李昌等題名

華州刺史兼御缺殿中侍御史庾缺監察御史李昌缺太常

博士缺太華三峯野客缺新安縣尉盧缺採藥使翰林缺監

軍判官尹懷監軍判官劉缺太華山人段籓押衙左金吾衛

大缺大歷六年乙亥缺

盧綸題名

前國子進士趙鄴將仕郎守闕鄉縣尉盧綸前同官主簿陸

涓前王屋縣令陸承前華州叅軍陸漸大歷六年二月二日

綸赴

劉奉等題名

押衛左缺衛大缺太華山人缺藩監軍判官劉奉監軍判官

尹懷監採藥使翰林缺新安縣尉盧缺太華三峯野客缺太

常博士缺監察御史李缺殿中侍御史庾缺華州刺史兼御

缺大歷六年乙亥 按此與李昌題名畧同

郭仲堅題名

江陵少尹郭仲堅大歷七年正月廿二日赴任大理寺丞劉

承構永樂縣尉徐瑄華陰主簿徐瑒送少尹至此 正書入行

侯季文題名

大歷七年三月廿日西上前鄉貢進士侯季文前緱氏縣令

康洽前開州刺史崔微男濟後有御樓禮

字

韋憑題名

醴泉縣令韋憑大歷七年十月廿八日題記

元澄題名

尚書虞部員外郎兼殿中侍御史元澄與大理評事盧恒華

為縣丞裴言則以大歷八年十二月三日題紀

謁華嶽文

在韓賞告華嶽文下之左方大歷九年季春立盧朝徹撰文

并正書

韋浼題名

朝散大夫前鄭州陽武縣令韋浼大歷九年四月十二日謁
祠題記

李謀題名

前鳳翔府司祿參軍李謀前長安縣主簿李融大歷九年十
月十三日題

上官銘題名

侍御史上官銘大歷十三年七月廿九日赴諫臺謁嶽過題
行書

韋綬題名

檢校水部員外郎崔頴華陰縣令韋綬華州司功參軍鄭齊
躬貞元元年二月六日記縣志正書按唐有兩韋綬此字于章
京兆萬年人為華陰令

崔漢衡題名

蓮華魏嵬竹箭喧厖浩浩今古憧憧往來銀青光祿大夫守
兵部尚書博陵郡開國公崔漢衡貞元元年十二月廿三日
與華陰令盧倣書縣志在昭應碑後分書

裴潏等題名

前萬年縣尉裴堪前華陰縣丞盧佩懷州河內縣丞盧渚鄭
驕進士裴諫裴謹貞元九年七月二十五日參軍事裴潏題

關中金 潞河東聞喜人善隸書

鄭全濟題名

將仕郎守尉鄭全濟字巨舟華陰縣尉李端士華陰縣尉鄭
暉貞元十三年三月廿四日題記 縣志在裴潞題名之下

尉旻題名

太常卿尉旻元和元年正月三十日題

郭豐等題名

華州司士叅軍郭豐華陰縣丞李泚華陰縣主簿姚鵬舉華
陰尉韓晤華陰縣尉苗華華陰縣尉崔杙門下典儀李誠明
元和元年七月十日同會于此代題

柳澗等題名

司勛員外郎薛存華陰縣令柳澗華陰主簿裴秩華陰縣尉
杜文舉前鄭縣丞韋殷前華陰縣尉王沂野客李 缺 元和四
年九月十九日

趙矜題名

大梁令趙矜恭謁聖帝祠下壬辰四月六日○此在韋公右
石刻行中未詳何時人 按天寶十一年壬辰元和六年壬辰
此在公右行中當是天寶後元和時

張鄂題名

右五行左行元和八年四月十五日刻行書

鄭公幹題名

李

題名

天

正書元和八年十月十日

李紳題名

正書元和八年刻

按李紳嘗習業于華山故于此題名

王高題名

正書四行元和八年刻

崔旆題名

太常寺協律郎李

缺

華陰令崔旆華陰縣尉鄭公幹華陰縣

尉裴混華陰縣尉陶洪進士蘇莊元和十年五月十二日

裴度等題名

淮西宣慰處置門下侍郎平章事裴度副使刑部侍郎兼御

史大夫馬總行軍司馬太子右庶子兼御史中丞韓愈判官

司勳員外郎兼侍御史李正封都官員外郎兼侍御史馮宿

掌書記禮部員外郎兼侍御史李宗閔都知兵馬使左驍衛

將軍威遠將軍兼御史大夫李文悅左廂都押衙兼都虞候左

衛將軍兼御史中丞密國公高丞簡元和十一年八月丞相

奉詔平淮右八日東過華陰禮于嶽廟總等八人實備將佐

以從

監察御史裏行裴 題名

元和十二年閏五月

朝議郎行華陰縣令裴賁丞柳升主簿霍冕

韓常謁廟記

右八行韋泰正書元和十二年十月十日

容府 題名

關中金 石記 宗室世系表有容府經畧推官李慶之容府經畧使

左庶子李景仁容府者卽容州都督府也屬嶺南道

張常慶題名

判官張常慶起居舍人賜緋魚袋王播元和十五年缺月一

十六日

王播題名

元和十五年十一月刻正書

鄭簡之題名

右殘字四行長慶元年二月一日行書

裴穎修嶽廟中門紀

長慶元年缺十三日朝散大夫行華陰縣令上柱國裴穎奉

勾當再修中門屋至廿五日功畢

缺名禱嶽神記

缺臣爲國討判思缺丹懇敬祭敬拜缺陳所期感通昭鑒不

殊列旌旗於綠野羅缺劔于明庭共展禮容因以題記太和

二年八月廿八日

李璠題名

太和三年十一月十五日正書

李虞仲題名

古石琅玕右正書十行太和四年七月

韋公式題名

太和四年上元日題

尙書主客員外郎題名

行書開成元年八月

縣令郊宗題名

開成元年閏月正書

李宗本題名

華陰主簿李宗本開成二年九月五日缺將赴京造辭金天

王遇遐于此便同道缺

馮耽題名

開成三年四月刻正書

李景讓題名

缺史兼御史中丞李景讓缺監察御史裏行盧缺李缺前右

龍武軍錄事參軍李映缺士劉灌缺李景裕缺盧黨缺鄭繁

缺士鄭毅開成四年六月十九日

古石琅玕正書共十二行關中金景讓字後已李燈之孫也

陳商題名

題名

三

關中金 石記 此題云司門郎中史館修撰題後又有後六年商自禮部侍郎出鎮分陝云云考商以禮部侍郎主文以延英對是辭不稱旨改授王起卽其出鎮之時也

崔郇題名

王議大夫守京兆尹賜紫金魚袋崔郇華陰縣令崔宏會昌二年六月十六日郇自汝海將赴闕廷時與宏同缺廟而過強至謁廟詩

詩七言行書會昌二年六月

崔慎由等題名

殿中侍御史集賢殿直學士崔慎由右補闕李當鄉貢進士

崔安潛會昌五年二月八日同赴缺關中金石記慎由爲宣宗伯寓尺簡于所知必稱安潛故時人有王凝裴瓚舍弟安潛之語後亦位至侍中古人之升沉後進如此

縣尉王季題名

行書會昌六年六月廿六日

李題名

右諫議大夫李缺大中元年三月三缺雨缺正書

楊漢公題名

關中金 石記 漢公隋越公後裔字用义官至天平軍節度使檢校戶部尙書題稱其官爲給事中當在爲同州刺史時前唐書

本傳不及之者畧也

李貽孫祈雪謁朝題名

大中三年十二月八日正書

鄭損題名

河東縣尉鄭缺前臨晉縣尉鄭缺前隴州叅軍鄭鄉貢進士

盧璫缺中四年九月五日紀

劉仁 修廟題名

大中四年十月十一日修訖正書四行

李貽孫題名

福建都團練觀察處置等使兼御史中丞李貽孫大中五年

七月廿七日缺鎮將男意承文蔚缺復含昭謁嶽而退

張權題名

大中五年八月刻正書

薛謬宋壽送座主尙書赴滑臺題名

大中五年十月廿七日期正書

于德晦題名

大中六年三月廿四日字三行正書德晦時官同州刺史

崔瓘題名

大中七年三月六日期行書瓘字汝器官至吏部尙書

崔彥昭題名

崔彥昭

題名

三

大中十一年五月十八日刻正書

李植題名

侍御史內供奉李植大中十一年十一月十三日自浙右赴

闕

張權題名

大中〇〇年四月刻行書

李祈方題名

字已泐李字下似行字朱楓作李祈方大中元年

李蟻題名

左諫議大夫賜紫金魚袋李蟻咸通元年十二月廿九日奉

恩命祈雪 咸通五年歲甲申六月六日刻正書

許環等題名

鄭縣丞攝尉許環宇文珪華陰縣尉薛殷圖咸通十一年十

月十七日題

司空圖題裴晉公題名詩

撫言裴公赴敵淮西題華嶽廟之闕門大順中戶部侍郎司空

圖以一絕紀之曰嶽前大隊赴淮西從此中原息戰磬石闕

莫教苔蘚上分明認取晉公題關中金石記今此詩只存首二句

作嶽前大旆討淮西則有二字異矣圖書世所罕見則此十

四字可寶也

李益等題名

關中金 石記 唐有兩李益一宰相揆族官至禮部尚書一為太子

庶子此未知孰是廟內凡為唐人題名而無年號可見者又有盧舒韓解劉承○李賞李成允崔恭蔣羅漢韋彪等共八石考宰相世系表韓解官至太子中允崔恭至汾州刺史韋彪至唐州刺史○皆不得其人蔣羅漢則內侍省官也廟中舊碣極多向為明人修五鳳樓用作令適柱礎余以乾隆四十三奉

勅重修乃始易以磚石既于舊址加整亦使古物不墜于地後來者其重之也

後唐張希崇題名

清泰二年十月刻正書

楊凝式題名

清泰乙未

月刻正書

關中金 石記

王應麟云華嶽題名自開元

迄清泰蓋即此是也黃庭堅云見顏魯公書則知歐虞褚薛未入右軍之室見楊少師書然後知徐沈有塵埃氣少師筆札重于一時得片紙寸書者寶逾于拱貝而此題名竟埋湮於殘題斷砌之間數百年莫有問之者于以見採錄之功為不小也

後周樂安公題名

華嶽志

卷四

三

廣順癸丑歲六月廿日陪從本府待中樂安公准勅祭金天

王行禮畢缺遜書甲寅七月一日遜缺官與缺廉判金城員

外郎缺廟因留題于此

趙宗儒題名

宏文館校書郎趙宗儒義陽府左果毅丁希詠前鄭縣主簿

李益三人同謁前潞府參軍穆準懷州權嘉縣尉穆戒○年號缺

李境題名

缺千牛李成允下邳縣丞李境缺二月二十三日題

按殘石又有進士李賞下邳縣丞李境題名數字亦無年號

題名

廿三日自缺興軍府事奉詔乘傳歸闕將長子太子中舍

恭次子左侍禁益昌長孫太常寺奉缺郎慎言祗謁靈宇題

名舊石

崔恭題名

河南府參軍崔恭缺華州參軍韋缺安邑縣尉缺

歐陽修華嶽題名自開元二十三年訖後唐清泰二年實

二百一年題名者五百一人再題者又三十一人錄為十卷

往往當時知名士也或兄弟同遊或子侄并侍或僚屬將佐

之戚在或山人處士之相攜或奉使奔命有行役之勞或窮

高望遠極登臨之適其富貴貧賤歡樂憂悲非惟人事百端

而亦世變多故開元二十三年歲在丙午是歲天子耕藉田
 賜大赦羣臣方頌太平請封禪蓋有唐極盛之時清泰二年
 歲在乙未廢帝篡立之明年也是歲石敬瑭以太原反召契
 丹入自鴈門廢帝自焚于洛陽而晉高祖入自太原五代極
 亂之時也始終二百年間或治或亂或盛或衰而往者來者
 先者後者雖窮達壽夭參差不齊而斯五百人者卒歸於共
 盡也其姓名歲月風霜剝裂亦或在或亡其存者有千仞之
 山石爾故特錄其題刻每撫卷慨然何異臨長川而嘆逝者
 也其無歲月不可次第者別為一卷

宋楓雍州 西嶽廟題名碑峇西嶽廟門樓下稱五鳳樓樓凡

五間中三間左右各一明時地震後以碎碑砌左右門牆那
 右牆下所砌碑已鎚鑿漫滅間有可識者○有云司勳員外
 郎薛存華陰縣令柳澗華陰縣主簿裴秩華陰縣尉杜文舉
 前華陰縣尉王缺野客李田元和四年九月十九日○有云
 正議大夫使持節諸軍事守華州御史中丞充潼關軍等使
 上柱國開國男食邑三缺金魚袋李虞太和四年七月十缺
 詔以立秋祀南都團練料官事柳乘同來○有云監察御史
 于德晦華州鎮國軍判官試大理評事缺大中六年二月二
 十二日○有云紫金魚袋張缺○有云戶部侍郎楊凝式銜
 叩祭缺○有云諫議大夫李祈方大中元年三月三缺○又

左角門樓牆下亦多舊碑皆漫滅無一字可議按集古錄云華嶽題名五百一人再題三十一人自開元訖清泰今所存無幾故於零落殘闕之餘記之特詳通計得題名者六十二人顧亭林金石文字記云嶽廟牆下亦有唐人題名今玉無異所楊者只九十二人有裴士淹李商隱名茲余所見又少于前而李德裕李商隱之名已不可覓矣

杜錫等題名

平陸主簿杜錫 城主簿杜梅建 缺 三月三日

按年號缺第二字或係唐建中宋建隆時人

宋周約題名

在上官冲題名之後雍熙二年八月十一日記正書

侯建中謁祠記

三班奉職侯建中與殿直侍 缺 奉命到此經過時淳化五年

春仲八日記

梁灝題名

宋咸平三年誅 缺 部叛卒王均之 缺 右司諫知制誥梁灝審

刑院詳議官秘書丞李易直奉命安撫巴峽路 缺 華陰同謁

關中金 宋史灝本傳是年冬王均平命灝為峽路安撫使通

鑑長編命翰林學士王欽若知制誥梁灝分為西川及峽路安撫使國子博士李及甫秘書丞李易直副之所至錄問○

囚自死罪以下得第降之上諭欽若等曰朕以觀省風俗尤難其人數日思之無易卿等各宜宣布德澤使遠方知朕勤卹之意

高紳等題名

右司諫直史館知華州高紳尚書戶部員外郎直史館曾致堯陝西轉運副使太常博士李易咸平四年閏十二月十五日

江仲甫題名

咸平四年閏十二月十五日何淑正書

劉繼元等題名

史館知華州高紳秋祭謁廟與刑外郎仕韓見素

賓幕 缺 劉繼元同遊咸平六年廿一日躬翰 缺 夷直捧硯

又觀察推官劉繼元節度推官韓翽

仲卿祭告記

景德二年

龐奎題名

缺 州之鎮日十月孟旬承命匠事至十一月五日畢將表于

上因刊闕石以記歲事之紀將仕郎試芸閣史守主簿龐奎

題將仕郎守下邳縣主簿本令修監催將作監丞守廟令楊

璘將仕郎守太子洗馬知縣事許孝恭 缺

按景德二年龐奎修造靈寶三錄題名當在其時故錄于此

虞部郎中淳于廣謁廟記

祥符建號一載季秋刻分書

張懷彬題記

天書九載孟春十日入內供奉張懷彬道場於嶽祠入內高班孫可久投龍于仙谷偶會入內高品李懷疑自涇原承受解秩歸闕時與知縣大理寺丞張綽同焚香於金天順聖帝致誠而退孫題

關中金石記

天書九載者大中祥符之三年也

李濬謁廟記

樞密直學士知秦州李濬于大中祥符三年二月二日赴任

經 謁

龐房謁祠記

大中祥符季秋刻正書

宋垂遠等謁祠記

關中金石記

文云閣下祗候宋垂遠奉命提點京西刑嶽公事詔

旨給假迎侍北堂與弟秘書省正字寧遠知邑棘丞師仲宰知京兆昭應縣張綽進士龐房同告謁嶽祠按宋史宋璫傳子明遠都官員外郎次子垂遠閣門祗候不及寧遠名龐房報祀記云師仲宰以大理寺丞知華陰縣事

何昌齡謁廟記

大中祥符四年二月正書

陳繼昌謁廟記

聖宋祀汾陰歲仲春月刻第十孫陳知新正書

任中正謁祠記

大中祥符四年十一月刻正書

盛亮摹勒御書記

皇帝祀汾陰明年三月立正書

蔡汝祭告并王懷珪嶽廟設醮記

大中祥符九年六月二日入內侍省內侍高品王懷珪奉

宣于嶽廟真君觀道場七晝夜罷散日設醮一座續勅差

太子少卿蔡汝賚祀版祭告同會于大理寺丞知縣

事張綽書長安普濟廣教大師澄遠

薛田魏野謁祠記

大中祥符年正月望日題道士姚文刻關中金石記宋史魏野

傳魏野字仲先陝州陝人隱居州之東郊祀汾陰之歲與李

瀆並被薦不赴按此題云徵君魏野當是被薦之後薛田字

希稷

李知常建醮記

大中祥符年六月十四日入內侍內侍省高品李知常奉

缺賚恭詣金天王廟及處請道士二七人悟真大師缺

建靈寶道場三晝夜散缺共七百二十分刊石為紀

許文題名

將仕郎守許文德天禧三年十月二日題

劉錯謁祠記

天禧庚申歲刻

上官冲暨進士周慎題

乾興元年五月初六日 奉職上官冲暨進士周慎缺躬謁

缺祠

范雍謁祠兩記

缺雍去年題名在後今歲自三司度支副使遷此官復為本

路轉運使再謁靈祠天聖癸亥九月十四日

陝西轉運使尚書兵部員外郎賜紫金魚袋范雍乾興壬戌

朱漢臣題名

壬戌歲乙巳月庚子朔辛亥日漢臣自承興軍知鄂縣奉勅

就移缺判嘉州專禱靈祠西去赴任太子中令缺臣進士缺

同行缺甲子歲丁丑月解罷至乙缺歲戊缺月赴闕當歲壬

午月壬午朔丁酉日缺勅同判華州于乙酉月庚戌朔辛亥

日祭禱靈嶽殿中丞朱漢臣題關中金石記乙丑歲乙酉刻是天

聖三年也

劉近謁聖容記

天聖三年四月十三日

李侃題名

李侃奉勅祈雨申寅三月晦 在華嶽頌碑中空處

陳執中題名

陳執中自天章閣侍制除龍圖閣直學士知永興軍府景祐

四年太歲丁丑十月五日齊謁嶽帝之祠謹誌 金石文 在述

聖頌碑陰韓賞文之下方執中宋人所諡為榮靈者乃其書

則不俗也

王堯臣題名

翰林學士 缺 閣學士睢陽王堯 缺 苑使英州團練使內侍副

都知大梁藍元用被詔綏撫涇原慶歷壬午仲冬五日恭謁

金天帝祠

按題云被詔綏撫涇原又云經畫西事以史之年月事蹟考

之當卽王堯臣也

施昌言題名

慶歷七年秋修西嶽祠成十月十三日天章閣侍制知華州

事施昌言恭伸謁祀

程琳題名

推誠保德功臣宣徽北院使武昌軍節度鄂州管内觀察處

置等使光祿大夫檢校太傅使持節都督鄂州諸軍事行鄂

州刺史兼御史大夫充陝西安撫使兼鄜延路經畧使馬步
 軍都部署判延州軍州事管内勸農使上柱國安定郡開國
 公食邑三千九百戶食實封七百戶程琳丁亥歲六月十二
 日塗次華陰恭謁嶽祠大理寺丞通判華州于待問大理寺
 丞簽制永興軍節度判官楊士彥前越州諸暨主簿陳傑廣
 文館進士留慶祖男太常寺太祝嗣隆嗣弼嗣恭姪男太常
 寺奉禮郎嗣直從行

葉清臣題名

翰林侍讀學士尚書戶部郎中知永興軍府事本路安撫使
 兵馬都部署吳興郡侯葉清臣慶歷丁亥秋赴官便道恭欵
 神祀明年四月蒙恩召還再經宇下于時通判永興軍府劉
 紀駐泊都監王仲平管勾機宜韓鐸知涇陽縣施逸同州觀
 察推官李孚從行

田況謁祠記

在汧國公題名後正書左行慶歷丁亥仲冬望日樞密直學
 士田況 命赴涇原與弟缺同謁

傳 題名

皇祐三年缺九缺轉運使尚書兵部郎中傳缺奉詔歸闕恭

謁靈祠

李杞謁祠記

華州渭南縣主簿權華陰縣事李杞伏謁靈祠皇祐辛卯仲冬初二日題

程琳題名

程琳皇祐己亥三月十六日蒙恩制除中書門下平章事三月十九日奉勅就差判大名府兼留守事河北安撫使二十八日被詔入覲四月十八日再經華陰恭謁嶽祠題

張恭禮建醮記

嘉祐四年三月初五日入內侍省內侍高品張恭禮奉聖旨於西嶽廟缺道場七晝夜請道士二七人罷散日設醮一座二百四十分謹刊記之 在乳香碑右側

程遵路謁祠記

在沂國公題名之後上方隸書嘉祐七年三月試校書郎程遵路恭謁祠下

史炤謁祠記

太常少卿史炤自缺州路轉運使奉命還朝恭謁祠下治平三年十月廿三日題

閻詢謁祠記

諫議大夫閻詢還朝恭謁金天帝戊申重陽日二子籍簡侍

行記 正書

楊遂題名

宋馬軍都使容州觀察使新瑛慶副都總管楊遂熙寧庚戌

七月二十七日恭謁靈嶽 在天和碑末

陳繹題名

宋熙寧二年九月守彰化十一月移本路轉運副使制置解

鹽使明年十一月移京東轉運使十二月三日過華陰河南

陳繹題應體用科彥古進士彥恭彥成侍行馮翊保定二解

元盧定趙豫同謁于金天祠下

呂黃謁祠記

郡呂黃自京師缺安過謁男大忠大鈞大臨大觀侍熙寧

四年五月五日

劉忱之題名

提點刑獄尙書職方郎中劉忱之任蒲中恭謁祠下男唐工

唐老唐純唐傑唐詢侍行熙寧辛亥孟夏二十日

張孝孫謁祠記

銀青光祿大夫殿中缺將軍左金吾衛大將軍節度副使元

從鎮國大缺潼關節度都虞侯張孝孫恭謁靈祠熙寧辛亥

中元日題

林顏題名

熙寧辛亥仲冬刻正刻

蔡延慶題名

治平丁未夏領本路提點刑獄謁祠下後六年蒙恩除天章閣侍制秦鳳等路都轉運使過祠下恭謁金天帝宋熙寧六年癸丑正月廿九日東萊蔡延慶仲遠氏題

劉航題名

河南監牧使劉航仲通提舉牧羊公事邱舜中至徒同謁祠下熙寧癸丑仲秋十七日題

盧訥祈雪記

汶上盧訥洛陽程旨樊川王讜從紫微呂公所雪熙寧癸丑仲冬十九日謹題 在石幢程琳巳丑題名第二面上

陳絳題名

熙寧七年三月廿二日尚書職方員外郎陳絳自秦梓移開封令恭謁金天帝祠下彥默彥淵正侍行

王欽臣謁祠記

熙寧十年三月三日刻正書

張淑卿題名

張淑卿被命之利路恭謁祠下男試秘書省校書郎康伯侍行熙寧十年三月十九日題

蔡確謁祠記

熙寧 年六月刻正書

孫迴謁祠記

元豐戊午 月二十七日題正書

缺姓 題名

元豐戊午 缺 月二十七日再謁嶽祠時自本路移河北 缺 雲

臺武 缺

俞次臯題名

元豐元年十月十三日侍親出帥華池與友人鮮于溱宋彰

恭謁祠下鄧江俞次臯謹題

薛昌朝題名

薛昌朝昌年昌謬范師軻同謁祠下元豐元年仲冬二十九

日

蔣之奇題名

元豐己未六月刻正書

蔡延慶題名

元豐己未夏自龍圖閣直學士涇原路經畧使赴詔謁祠下

蔡延慶仲遠題

劉陶題名

通直郎劉陶恭謁祠下元豐五年正月十九日

趙諒題名

元豐五年孟秋被命華山雲臺觀謹于祠下朝拜文思副使

趙諒記

題名

四六

張舜民題名

元豐五年缺元祐丙寅自號還幽往來皆拜嶽祠張舜民書

叟記 石闕後

薛紹彭題名

樂安薛紹彭富沙范勃元豐六年六月十六日

王顥謁祠記

缺王顥張彥世自東都來恭拜祠下雲臺楊宗誨巨靈張宗

慶同至元豐六年九月十七日

陳康民謁祠記

缺陳康民大中雜陽缺仲時伯唐安王可道通之同謁欵嶽

祠元豐七年歲次甲子八月初二日謹題

王子文建醮記

元豐乙丑歲戊寅月被旨設醮于嶽祠癸丑恭薦齊誠王子告畢奉議郎知華州軍州事王子文謹記男知章侍次

杜詵等題名

奉禮郎杜詵光祿主簿蘇舜欽將作主簿司馬且京兆掌書

記趙訥京兆尹缺曹張復太廟缺

杜純謁祠記

缺轉運使蒲陽杜純携家恭謁 祠下元祐四年閏月初十

日男開奉命書

游師碓題名

陝西轉運副使使游師碓元祐九年正月廿二日觀太華三
峯 在玉泉院字徑一尺五六寸

游師碓題名

游師碓奉缺關中祭禱祠下元祐〇年正月九缺

游安民祈晴記

元祐癸酉仲秋刻

胡宗回謁祠記

紹聖元年季秋廿三日刻正書

陳知存謁祠記

元符已卯季秋初九日正書

○擇仁謁祠記

缺擇仁被旨赴闕率馬敦古謁祠下崇寧四年五月二十八

日

梁慶祖題名

東汶梁慶祖大觀四年九月二十八日恭謁金天順聖帝祠
時侍親自錦江之蒲

李傅題名

朝奉郎新差知耀州李傅專心致祭恭謁帝祠供養大觀四
年十月廿一日

宋達題名

西河宋達遠夫弟造安道恭謁金天帝祠政和二年重午日
時將赴官嵐川姪修仔從行

謝璘題名

宣德郎前知京兆府涇陽縣事謝璘承奉郎簽書永興軍節
度判官廳公事趙缺政和壬辰二月初三日同謁祠下題

席旦題名

顯謨閣直學士席旦政和壬辰再守成都恭謁祠下三月二
十三日奎益從

楊可世題名

楊可世可譁可昇可輔可弼可晟恭拜祠下政和四年二月
初三日暮題白瑛劉丁梁定史彥臣同行

張子定題名

郡守張子定從事趙衆龔懋檢校杜宏錢揚紫著樊寶自三
峯考試回同拜祠下政和四年二月五日

宋雲從題名

汾陽宋雲從弟宜之刻題政和甲午

蘇莊王干謁祠記

政和五年仲冬己巳提點刑獄蘇莊提舉茶事王干同謁祠
下 在石幢

趙伍謁祠記

政和丁酉孟冬癸酉題正書

梁激題名

交印東還恭謁金天帝祠下宣和辛丑重九二日朝請大夫

前知華州東平梁激

梁鼇謁祠

東平梁鼇弟鯤侍親恭謁祠下宣和辛丑九月十二日

殘石題名

宣和六載歲缺月三日男開以缺赴華倅缺

薛休題名

中大夫致仕蒲津薛休恭奠西嶽金天帝元祐七年十一月

十日記男宣德郎知華陰縣事兼兵馬監押昌道孫太廟郎

鐔鈞鑄鈹鉞鐸偕侍

潘浹謁祠記

建炎改元刻

蔡挺題名

太常博士蔡挺殿中丞楊士彥男太常寺太祝嗣隆嗣彌嗣

恭嗣先侍行

麻溫舒題名

尚書職方員外郎知郡事麻溫舒奉御署祝版立秋日致祭

嶽祠

金李成誥謁祠記

大定十九年刻正書 宋淳熙六年也

左○題名

麟野左○還自西秦敬謁祠下永安庚申秋三日男倪侍行

田曦謁祠記

泰和七年四月刻正書 宋開禧三年也

元敷濟等祭嶽祠紀

缺之初雲開霧霽月色皎然缺在其上俎豆將徹陰雲復合

神之顯仁藏用蘊智含靈缺之雷霆潤之風雨是皆所缺在

德而無不應也代禮官恐勝事不聞于今而泯于後命予○

作記以載諸石辭不獲已敬為之書至元二十二年九月日

典史傅濟上石知廟孫志信閣志冲虛靜大師西嶽廟提舉

李志實體真靜虛大師西嶽廟提點姚志元洞陽真靜大師

西嶽雲臺提點王志明 將仕郎華陰縣主簿兼尉事高誼

缺尉缺縣尹兼諸軍與魯王忙兀歹進義副尉華陰縣達魯

花赤兼諸軍與魯大布

甘澍之記

大德九年重九日立顏守瀾正書并篆額

伯忽題名

大元延祐四年歲次丁巳冬十月皇帝爲泰山變移賑撫百姓特命開府儀同三司太傅御史大夫伯忽中奉大夫中書叅執政事王桂大都大長春宮道教代真王道亨賈香馳驛致祭于西嶽金天大利順聖帝之祠同行監察御史亦憐真朶兒只王升書武將軍尙供總管府總管吉利八太傅府通事教化的太傅府驛使忽刺哈失宜使阿兒思蘭御史臺驛使脫歡宣使教化的中書掾姚義勝蒙古必閣赤月賜帖木兒王典赤任普大長春宮提點袁道粹楊道真旣至陝西行省叅政忙兀台洎州官縣宰皆承命嚴肅牲體具舉禮儀不愆天氣澄肅神人咸悅茲非惟見聖天子敬神撫世之仁哉道門千載一時之盛典也遂爲記之延祐四年臘月九日西嶽提點孫志信立石

明桑溥題名

正德己卯夏六月丙寅進士知華州事帝邱桑溥同官屬知縣李珍等禱雨祠下溥題記

韓邦奇題名

苑洛韓邦奇以山西按察副使致仕蒼谷王尙綱以四川叅政致仕用薦詔起陝西舉人楊九澤相候同謁廟下嘉靖四年乙酉冬十月望日題

王尙綱題名

皇明丙戌○月二日缺王尙綱錦夫副使山東桑溥汝公僉事青州劉雍堯臣同謁嶽祠溥題記

楊一清題名

少傅兼太子少傅武英殿大學士兵部尙書兼都察院右都御史提督陝西三邊軍務石淙遂菴楊一清叅政督理驛傳古鄆楊叔通督理糧儲洪河韓士奇分守關西道汝陝王尙綱叅政分守關內道信陽孟洋副使提督舉校蘭溪唐龍整飭固原兵備帝邱桑溥分巡關內道西蜀江份僉事提督屯田青州劉雍嘉靖五年春少傅公奉詔還朝二月二日東歸華陰謁廟祖于嶽樓叔通等凡人人各以職務隨行命尙綱

敬志碑陰以紀恩命云

胡忠題名

大明嘉靖七年五月十日陝西布政司右布政使司興胡忠右叅政督理糧儲南充羅方右叅議撫缺商洛武昌孟廷柯同謁祠下

郭鳳翔題名

大明嘉靖七年五月十日陝西按察司整飭固原兵備副使大梁郭鳳翔分巡綏西路邊備僉事西蜀張大用同謁祠下

王瓊題名

兵部尙書兼都察院右都御史太原王瓊奉命總制陝西三

邊先是全陝久旱不雨公方涉河入陝風雲交會及至華陰
 卽就嶽廟祀神適都察院左僉都御史信陽孟洋亦奉命巡
 撫寧夏自西而來同賞嶽廟石刻是日濃雲閣雨亦頗飄疎
 點未及濕衣至次日大雨沛降遠近沾足官民騰歡而秋成
 有望矣時邑人屈直以都察院左副都御史致仕家居陪行
 謹題于此以誌喜慶云嘉靖七年五月十三日華陰縣知縣
 雁聞仲字刊

熊爵題名

巡撫四川監察御史大梁熊爵凡三入潼關五瞻華嶽時嘉
 靖十年二月識此時門生岑魄華陰尹陳岷侍

高軒題名

嘉靖丁酉夏六月五日戶部河南司主事灤城復菴高軒奉
 命督○寧下祇謁祠下

魯經題名

前鎮守陝西總兵官前軍都督府都督同知莊浪魯經奉特
 旨統調官軍家丁三千餘名前赴山西宣大等處征勦虜寇
 恭謁西嶽祠下嘉靖二十二年八月初五日誌

趙鯤題名

嘉靖癸卯冬十月旣望予以清戎來署潼關道經華陰會因
 以觀華之勝而時陰翳未明縣長吏袁廷瑛固請乃登至青

柯坪殘雪融途不能復進仰視西峯直入霄漢悵然而歸
西清軍副使趙鯤題

錢若水謁祠記

缺 史館錢若水 缺 寺丞直史館陳 缺 承命觀稼馳 缺 關同謁

斯廟 無年號

尹衡題名 在玉泉院

缺 局承奉平川尹衡遊眺甲午春三月重遊 無年號

嶽廟石盆銘

采山飲河沐日浴月布敘雲雨永鎮金闕王宏撰銘并書

毛女峯石刻 隸書無歲月姓名其文曰茯苓諸山皆假惟此

者真一旦一九三斗一斤陳后山談叢云疑為服茯苓法也

以下玉泉院及山內題
鐫明以前剝毀失考

玉泉院 黃天植書無年號

山蓀亭 無名氏

山蓀亭 分書失名

幽人鼓吹 文翔鳳題書

泉石幽棲 知華陰縣事平定魏天章題書

高臥文峯 五峯主人段可缺

希夷雲臥 分書失名

清風高節 天啟乙丑文林郎馬

太素元精 萬歷癸未中秋知華陰縣事周南劉若水書

希夷遺塚 萬歷辛亥首夏洛陽太乙張獻圖刊立當塗孫啟信

五嶽宮先 萬歷庚寅三月羅經趙從紀書

五嶽朝天 欽奉鴻臚富平西峯田新若題

三峯插秀 大明嘉靖壬子秋鄢陵文岡陳棐題

文岡登覽 壬子九月以秋官郎恤刑過此

蓬萊仙境 萬歷歲次丙申年孟 吉日同建

人龍臥處 失名 以上俱在玉泉院

白石清泉 在谷口石上

醉溪 在玉泉院東谷口

梯雲 在谷口

雲根 在谷內大石乾隆間為石工盜斫今無

王猛臺 在谷內臺下達禮善題

壽山 在王猛臺西南石壁

西京王氣 在一天門王象乾題書

真源尋問

醉雲臺 俱在希夷峽文翔鳳題書

流雲 在希夷峽文翔鳳題書

冲舉 在十八盤文翔鳳題書

御風振衣 在十八盤王象乾題書

鳳笙鶴管 在水簾軒文翔鳳題書

八翼浮空 在迴心石旁文翔鳳題書

手攬天痕 在迴心石旁文翔鳳題書

高尋白帝

目空萬里

天威咫尺

萬象空濛 俱在松檜峯俱失名

石公峯 在松檜峯袁宏道題門人王之良刻

凌風天際 在南天門失名

以險為奇 在南天門失名

天外遠觀 太虛同遊 峻極于天

神明奧區 平臨日月 手可摩天 耳通天語

兒視諸峯 俱在落雁峯俱失名

袖拂天星 在落雁峯王宏撰題書

與天者遊 在落雁峯東

蓬萊頂上行 在落雁峯壁

語驚天上 在落雁峯西失名

上池天液

在洗頭盆石上失名

呼吸通天

在東峯失名

獨立振衣

在西峯壁上趙煥題書

高可留雲

在西峯壁上失名

枕破鴻濛

在西峯壁上孟津王鐸書

天下壯觀

在西峯壁上王宏嘉題書

擎天捧日

在仙掌峯失名

振衣千仞

在玉女峯果親王題書

天孫錫

在玉女峯路一麟題書

虛憇五夜

在玉女峯王宏嘉題書

龍神祠碑

王履記 龍神祠外小碑詞翰俱美

今亡

避詔崖

在南峯希夷手書

全真崖

在賀老石室上高十餘丈字大仞許非御虛者不露

